



ル 5  
3048  
15



門 儿 8  
號 3001  
卷 15

門 儿 8  
號 2301  
卷 15

門 儿 5  
號 3048  
卷 15

崑新兩縣續修合志卷三十三

好義

元

朱旭字子陽宋行省左丞清子元初以薦授忠顯校尉海  
 運千戶告歸卒旭少學書於趙孟頫為學士虞集稱賞  
 性好施勇於為義嘗出粟賑饑買棺掩骼鄉里德之  
 王允吉字吉卿元季時守令頒歷於民而取其直允吉日  
 歷以授人時也昔以利民今為民厲願出所有以佐用  
 由是里中得免嘗行道見索逋者怒詈不已負者默不  
 敢答允吉惻然為代償之友人陸均祥寢疾一子從成  
 遠召允吉託以後事允吉為之營葬事其妻如嫂妻顧

昭和九年  
六月十八日  
辨末

亦能佐允吉行其德孫永和

葉苗字秀實居南鄉之石浦樂善急義有古豪傑風元末方國珍亂海上小人乘間而起積磧村福嚴寺僧有提點者與其徒昌都寺等亦聚無賴殺人肆焚劫有司不知所爲賊勢漸張禍且及苗其姻家金某刺知之賂以重貲乃得免苗憤曰鼠輩敢爾不剪除之又一國珍也陰募勇敢士得徐辛一等若干人經略已定乃繪賊焚劫之跡上之當路率衆掩捕盡得之無脫者官爲窮詰皆伏辜而有提點實先瘕死苗聞之曰佛法重閻維戲作舉火文以著其惡鄉里稱快苗少贅周家涇金氏延祐中卜居沈安涇東家無厚蓄而性好客往來吳越間

遇佳山水輒吟咏寄意子震宗孫茂並修德好義能讀書卒年俱八十餘茂子明卽侍郎盛之祖別見子春傳盛官中朝時出苗事實名公卿競作傳誌詩歌以表之管善處士珪子珪字仲玉有隱德善嘗以先志割常稔之田四十五畝入校官養士至正二十三年知州俛俛斯訪先賢王葆李衡劉過墓而封表之善謂諸賢之墓不可無祭祭不可無田復割田三十五畝爲祭祀修葺之用且以其父珪之葬馬鞍山也請耐其主於龍洲之祠俛斯如其請般奎爲之記

明

周勉字元學好讀書多隱德凡與肩挑貿易必寬其值雖

崑新縣志卷之三十三  
受人欺心亦甘之待勞力之人先飽其食僮婢尤加恤  
勤奮者厚犒之故人皆樂効力嘗置產三畝其值因畧  
其門曰一田三價買六子百年耕其存心仁厚如此人  
皆頌其德

王銘字與新居度城景泰甲戌東南大饑且疫詔下有司  
凡民輸粟於官者授以冠帶時邑令鄭達初下車民皆  
向之求食填塞衢路民哭達亦哭乃連日夜走鄉郭民  
家饒裕者入門勸諭官立質券貸穀給饑民粥銘首輸  
粟五百一鄉賴以生詔賜七品服同時有諸樂耕居澗  
漕里官至給券樂耕曰無煩享贏餘而坐視溝壑可乎  
慨輸七百斛有司以聞授冠帶爲義官

遇佳山水輒吟咏寄意子震宗孫茂並修德好義能讀  
書卒年俱八十餘茂子明卽侍郎盛之祖別見子春傳  
盛官中朝時出苗事實名公卿競作傳誌詩歌以表之  
管善處士珪子珪字仲玉有隱德善嘗以先志割常稔之  
田四十五畝入校官養士至正二十三年知州俱侯斯  
訪先賢王葆李衡劉過墓而封表之善謂諸賢之墓不  
可無祭祭不可無田復割田三十五畝爲祭祀修葺之  
用且以其父珪之葬馬鞍山也請耐其主於龍洲之祠  
侯斯如其請般奎爲之記

明

周勉字元學好讀書多隱德凡與肩挑貿易必寬其值雖

受人欺心亦甘之待勞力之人先飽其食僮婢尤加恤勤奮者厚犒之故人皆樂効力嘗置產三畝其值因畧其門曰一田三價買六子百年耕其存心仁厚如此人皆頌其德

王銘字與新居度城景泰甲戌東南大饑且疫詔下有司凡民輸粟於官者授以冠帶時邑令鄭達初下車民皆向之求食填塞衢路民哭達亦哭乃連日夜走鄉郭民家饒裕者入門勸諭官立質券貸穀給饑民粥銘首輸粟五百一鄉賴以生詔賜七品服同時有諸樂耕居瀾漕里官至給券樂耕曰無煩享贏餘而坐視溝壑可乎慨輸七百斛有司以聞授冠帶爲義官

周南字元凱世居石浦以力田致饒裕有司選長鄉賦率先公後私其催科之善徭役之均民不擾而事集景泰乙亥夏不雨民病南告於部使者曰苗槁矣非除田租民將去其土部使者上書得旨蠲停南曰租雖除如目前饑饉何發私粟賑之民賴以活南少喪父母哀毀如禮稍長奮於學家居尤篤倫紀卒年六十九

陳速字思達先世揚州人元時高祖珪以弟珪任崑山教授遂家焉速少負英氣讀書不就業農成化間兄近坐事繫獄論戍速不避艱險上書訟誣得釋有客某寓崑與速善病歿具棺殮函骨歸葬之有馬姓負速緡錢不能償易重稅田爲輕稅以抵速憐之不問所負仍返其

田時爭以義士目之嘉靖辛丑邑人張羽表其墓

嚴春鄉民也家素饒而好善正德己巳庚午皆大水餓殍滿路春出已地瘞之懸金以爲傭值衆利其金爭載尸往瘞焉

魏庠字子秀校從弟以貲補南京驍騎衛知事改光祿寺典簿致仕庠襲父遺田數百頃多爲德於鄉時里苦重役上戶多巧免移之下戶庠獨自占其役俾得休息縣令郭楠嘗造庠見廳事側有荒冢問故庠曰其子孫欲售之久矣與之直彼不以治生而棄其骸骨於水火故寧存之楠曰此古人誼也咨嗟良久而去先世出莊渠李氏族姓百數校歲廩有差庠踵而行之誠子孫世勿

絕子希直字溫甫好行義不欲人知所歷市橋村舍有所見輒解囊以濟領嘉靖乙卯鄉薦家居四十年散家貲累萬金希直子尙賢字念屺萬曆壬午舉人大昌字山莪丙午舉人尙賢子文心崇禎壬午舉人自有傳

龔良相字輔卿其先本徐姓以遠祖嘗爲崑山丞遂家焉父芳娶於龔因冒其姓良相偉貌修髯饒幹局爲諸生時值倭寇攻城邑令祝乾壽發諸生守陴嘗以身翼蔽乾壽又身請督戰橫戈被鎗時有斬獲都指揮梁鳳擁客兵邀賞逗撓不進良相上書勸責鳳勉與寇戰旋亦遁去後以太學生謁選授光州通判己補蘄州興利除害民咸德之遷衡州告歸卒遊太學時刑部主事海瑞

以言事忤旨逮下詔獄良相詣政府稱瑞言事當法不  
宜逮請擊登聞鼓白狀政府謝遣良相而心壯之後瑞  
巡撫江左良相猶以藍衣白事多見採擇焉

柴秩字虞叙奇季子十歲通春秋二十入太學平居寡交  
遊慎言笑性嗜讀書無間寒暑時島夷通市浙直者剽  
掠歲見秩策其必內訌與姪輔元相期爲射會日夜講  
求戰守之具儲器械結俠客訓練丁壯多蓄弓弩油蠟  
之屬人或笑之嘉靖甲寅四月倭寇猝至邑令祝乾壽  
知秩才令守牛橋灣乃攻圍最要衝也秩與輔元率合  
族家丁三百人禦之輔元字子貞能左右射善矛槩尤  
長大刀城守四十六日矢無虛發遙見火光連弩射之

斃其四酋羣倭昇酋長牛角大王至城下一矢貫其顛  
有乘夜梯城者手提三百斤巨石壓而殺之秩又募壯  
士夜往新洋江燒賊船六十餘艘倭始懼不敢犯東城  
併力西關其酋長二大王死乃解圍去秩與輔元絕不  
言功惟乾壽心知其能深加歎服方城守時民駭走多  
枵腹秩出粟炊熟截竹爲器盛貯道旁以濟其飢全活  
甚衆圍解後家且中落丁巳就選得浙江布政司都事  
攝臨安篆築隄以防海水隄成而民不擾陞寧州判官  
署州事廉明尤著念母夏年高乞終養歸卒年六十  
潘蔚卿字元山諸生饒膂力能舞大刀騎射絕人家貧善  
事母母小恙輒抱持以行嘗偕友讀書元墓山鄰舍生

爲巨蛇嚙死蔚卿伺林薄間奮刀斷其首首飛復墮中  
犬犬立斃乃亂磔而火之蛇患遂絕倭犯東南蔚卿斬  
獲甚多嘗貫數十首級上功幕府抑之怒遁去見大澤  
中寇方聚飲又盡殺之太僕歸有光呼爲潘將軍北上  
載與俱亦嘗殺賊徐沛間晚歲種瓜黃渡以壽終

沈善字三善松溪簿誠之裔居吳橋讀書解經義論事津  
津具首尾嘗捐貲建吳家橋又以餘力建陶家橋陰行  
善事口不言功縣令張琳高其行延爲鄉飲賓薦授禮  
部儒士進英府教授

沈三益字華原少有至性父產落通賦當受杖三益詣縣  
代之童頂而耆冠受杖露頂尹稱其孝已家稍贏輒施  
予不吝將葬父母有願出樵售地者三益與之直而存  
其封同兄善積粟造吳橋人不病涉他行義甚多子夢  
祥好善有父風又楊起字文遠其先本陳氏有貧人將  
發父棺鬻其地起曰若戀厚直耶如其數與之冢得免  
孟紹曾字少魯世居張浦紹曾由諸生入太學選光祿寺  
署丞陞署正以疾歸築怡老園賦詩飲酒以終生平喜  
行善隆慶二年出粟濟全吳鄉諸河浦三十有四長二  
萬七千六百九十四丈是歲大旱全吳半鄉獨稔歸有  
光作文記之又嘗營葬親地旁可置數百家以卹閭里  
之貧不能葬者

胡嘉魚字麗甫父承憲以好施任俠稱嘉魚幼慧爲王世



貞所器許童試以額窄被遺乃放情博覽師事同邑顧  
懋宏與吳門王穉登張獻翼雲間莫是龍相善性亢直  
好義從叔文憲爲縣令所尼母彭與永訣嘉魚年甫十  
八亟檢田房二券持以通與令習者得免未幾懋宏罹  
鄉人難嘉魚冒險左右之已知事屬司理龍宗武宗武  
方按部松江嘉魚以獻翼爲宗武所重乞致書復慮後  
期夜自操舟抵松書達而事獲寢素精青烏家言論休  
咎無不應而非其意雖重幣弗顧也晚益堅持傲骨厭  
薄市井僦居城南以老卒年七十子甲桂  
玉踐字誠履太學生世居朝宗坊家素封事母以孝稱邑  
中疾疫災浸輒倡率勸募爲醫療賑濟之事親族之不

能喪葬婚嫁者皆取給無倦色尤恤農佃同里朱集璜  
著養人說贈之

陳應奎字心疇自角直移居干墩明季荒旱應奎召內外  
親屬凡四十餘家聚其宅出困粟養之粟盡糴米以濟  
而自屑糠粃佐食至歲稔始各辭去

陸世鑰字汝萊又字兆魚安吉從子居陳墓十三遊成均  
侷儻負才略里中遇不平事挺身白長吏懲以法崇禎  
末當事徵世鑰團練義勇保護鄉里乙酉夏江南失守  
世鑰聚衆千餘立寨湖中毀家給餉及 大兵下陳湖  
棄家入山以疾歸卒同時莊雅字晏如世居雞鳴塘從  
世鑰起兵率先鋒攻郡之盤門先鋒敗雅退走湖中請

救於黃蜚吳志葵皆無出師意乃往依陳子龍於松江子龍事泄亡命死雅匿里中教授生徒後遷嘉定野服黃冠垂簾賣卜終其身

附

范信者龔泰家僕泰家貧鬻信及其妻於長洲富室數年不通正德初泰益貧無所依一日適經其處信見之泣拜請至主家告其主曰此信故主誠不忍其流落欲望容留信夫婦不惜傭力圖報新主義而許之信值農務稍暇即肩負小販獲奇贏以周給之終身弗衰

國朝

○張立平字邇求魯唯子性好潔弱不勝衣讀書數行俱下與弟立廉同補諸生入復社有名乙酉之變所在遺

骸滿目立平兄弟倡議掩埋與曹夢元諸永明葉方恆輩擇地玉柱塔西聚骨數萬合為一冢名仁緣塔立平任費十之八又徧周親戚貧乏及窮民無告者杜門息影長齋繡佛以終立廉別有傳季弟立善字應仙樂施予至老不倦饋粥不繼止餘東城外負郭地六十畝康熙初復捐為義冢曰孝慈坵

○何鄴侯字漢功少孤苦力學年五十領順治戊子鄉薦公車不第歸喟然曰士大夫居官當有益於官居鄉當有益於鄉若徒鮮衣豐食取便自適曷以士大夫為會辛卯大水民多流亡鄴侯謀煮粥活之苦不得米乃草屨徒步五步一拜行募城市人皆感泣應之時貢生葉

方至倡捐米二百石孝廉葉方恒徐開遠共爲襄事董厥役者僧指一與諸生曹夢元也

○朱德興字仲雅其先歛人後自江陰徙崑山明崇禎末歲大饑餓殍盈道德興作米團以食餓者不繼則煮粥食之夜有盜入室鄰里譁德興起視識其人驚曰若何至此匿之明晨贈以金勸其改圖且許秘姓氏其人泣謝去卒改行有名家子以貧鬻身郡城德興以金贖歸後其子得補諸生乙酉七月城將陷與其妻沈坐以待命已而竟無恙但聞兵士相戒云此神祠也勿入旣得免見遺骸狼藉收而瘞之子孝政

○徐開法字茲念應聘孫少孤事母潘以孝稱由諸生入

太學甲申乙酉間當路以明經薦尋稱疾歸杜門課子足跡不入城市性剛直好義嘗以漕政大壞厯考前代漕規附以己議曰漕政考要其論解布謂布非崑產松屬太倉嘉定爲多在彼傾本色在崑便折色彼此通融大爲利益其論漕兌謂漕贈一項民間細布器物皆可算收糧米除正額外行月局恤等類黃米糯米皆可充數兌軍所需糧戶易辦速兌限而甦民力無踰此者當事採其言頗見施行滬上有王葉二姓指腹爲婚後王氏子貧落葉欲以女嫁富人而逐王氏子開法聞之招葉至懇切勸諭卒完其姻嘉定人有女美姿容爲黜僧誘賣於娼家隸大帥麾下有司莫敢詰開法贖而歸其

父母卒年五十三子乾學秉義元文各有傳

○何英字本初居度城少任俠長更折節所交多四方豪傑明季散家財團鄉勇斂漁舟聚眾澱山湖西接陳湖東連泖口以興復名後事敗詭裝爲農氓逸去一日夜走餘杭變姓名自匿會寇竊發官不能制浙帥傳檄能諭降者授府道職寇魁故與英往來乃懷檄往諭以禍福卽釋甲降以功授大名府通判大名京畿要路俗强悍鳴鏑如織英捕斬不少貧民有作奸悉繩之以法以最擢雲南黑鹽井提舉未赴卒英自少亢直少文自登仕版頗敬士夫人以此多之

○朱顯宗字闇生夏六世孫祖欽字威卿以孝友恭謹稱顯宗弱冠補諸生會外祖侍御周元暉以著書觸忌諱遠下詔獄顯宗毅然請行身捍患難事得白以貢授丹陽訓導福王時補浙江西安訓導南都失守奉魯王命攝縣事明年遷衢州府推官尋棄官歸順治辛卯夏大水民飢大吏不以上聞催科愈迫里中民洶洶思叩闕籲荒衆皆怯不前顯宗慨然就道挾次子昱以隨邑令率父老子弟踵門謝而里耆孫愚周延徐彥相先後觸暑匍匐赴都繪圖陳請給事中姚文然高顯宗義上言災狀奉 詔許蠲折澤及江浙十四郡卒年七十五子五晟昱景旦晨晟字與升垂髫補諸生讀書日盈寸好義重然諾乙酉城守時念里中飢者計口給糈兵至

擁至學舍前奮詈被殺旦出爲叔維宗後晨字孝升諸生隨任衢州桑海間奉母葉避衢之南鄉聞父在兵間冒險往至舜山遇父得共歸里後以哭母而卒晨子謚年十歲被俘逸歸痛父遇難不三月亦死

○王成周字維豐居白田父耀慶順治乙酉嬰城戰死成周爲兵所獲帥壯其貌釋之俾主軍中文書成周大書歸順等字百千紙散給遠近使粘於背所全活甚衆乘間脫走得父屍於積骸中葬之戈溪祖坐伯父道明爲怨家所殺力爲復讐抵罪與弟成易同繫三十年弟歿撫從子代理家政數倍弟所遺乃授焉晚卜居甫里卒年七十孫孝詠字慧音以長洲籍補諸生時長沙陳鵬

年守蘇識字詠於童試時延之入署旋入制府尹繼善幕先是江左五十年來漕弊叢生繼善奮意釐剔孝詠乃條列私派科徵筮倉淋尖水腳議兌諸弊端悉據以入奏得旨革除民以大甦孝詠子美有雋才繼善爲之地當得縣令孝詠不可卒不謁選

○朱時蘭字霖生父病刺血和藥以進得痊同懷兄性暴戾時蘭怡然受之明崇禎庚辰歲大祲設法賑濟全活甚衆國朝順治初草竊蠢動時蘭椎牛醢酒集里中豪勇告以國家威信天命攸歸爲善蒙福遂折其萌年八十七卒同里有朱洽者字浹生亦以孝義稱

○邠鼎邑諸生家於甫里康熙庚戌吳中大水鼎偕紳士

設廠施粥規條井井經冬歷春全活無算是夏疫癘大作病劇氣絕一晝夜得甦妻及子亦垂危而並瘳

○許福霜區糧者也康熙九年邑遇奇荒福詣縣陳結律雲歲調呂等區民情慘楚至草根樹皮亦無從覓刻難存活之狀邑令董正位遂委福募賑福募粟外兼募白糧糠粶更刊濟饑果報徧送巨室時有王雲程助米一百五十石吳民望助棉四千五百斤陳德公沈鼎銘湯聖沐輩協力欣助一時紳士並感動出粟計福所賑口數一百十萬有奇始終經理無倦色

○陳應選字伯皋天性長厚慕義如弗及有張姓挈貲寄業後客死江湖其家無知者應選召張戚屬舉子母錢

歸之不少隱沈某老而無子婢妊身矣負客逋欲鬻以償應選愀然曰若不慮爾祀漸耶卽代償之湖寇掠鄉鎮應選倡置木柵炮臺募鄉勇晝夜守禦衆賴以安

○顧楫字協滄沖從子順治初補諸生以賦冊呈誤生有至性年十六失恃侍父洪源形影不離家雖貧必具甘旨族之貧不能就學及無力婚嫁者輒傾囊欣助先是邑城北有世德社倉夏散冬收規畫頗備楫念南鄉去城遠且其地饒薄民無宿儲乃移世德倉米二百石別建社倉於瓦浦東躬較出入歷十四年既歸本世德倉更贏米四百餘石爲一鄉所賴卒年七十四曾孫思約字紹曾舉乾隆丁酉鄉薦以力學稱思約兄子有穀字

粒萬與弟有稜字衡方俱孝友能文所爲詩並秀拔無浮靡之習有稜補諸生早卒有毅性介特而遇里中善舉如葺文廟修橋梁及施棺惜字靡弗肩任不辭嫌怨教授後進門牆稱極盛以覃恩充里選卒

○呂廷章字德煥邑諸生受業宋用純之門誠敬備至師沒梓行其遺集并建祠馬鞍山麓捐田致祭性尤好義邑中如社倉育嬰堂皆竭力攸助不倦卒年七十一

○汪思聰字德達世居休寧順治初隨父世祿商於邑之石浦尋徙居榭麓村壯遊太學歷試不售以州同知需次歸遂不復出思聰性孝友饒幹才弟思睿被誣致訟詞連思聰學使邵嗣堯親鞫之對簿未數語嗣堯點首

稱善霽顏與語久之事得自生平勇於赴義患水鄉多病涉隨地築石梁以濟遠近便之嘗出粟數百石分貸貧戶資播種而不責償他若施構施藥施棉衣蠶帳之屬不可枚舉鄉邨子弟不能具脩脯輒廢學乃於所居之北坳設義學構樓以藏經史集長幼童子延師分課時巡撫張伯行方勅紫陽書院檄郡邑廣置義塾嘉思聰之義頒給所鈐理學諸書儲塾中並令諸生月課文藝郵送至郡而親加評隲士論榮之年八十四卒長子衡季子雯並以諸生入太學三子安舉康熙丁酉鄉薦安弟察積餼充貢咸好學行義有父風衡孫文星字東垣乾隆辛卯領鄉薦授淮安訓導師範端嚴喜引掖後

進諸生汪廷珍陳師濂尤所器許者後皆掇巍科以去  
乞歸後鍵戶讀書至老不倦卒年七十四

○黃宏字聖澄正義人父貞孟慷慨好義宏承父志嘗集  
同志於里中倡立義學並籲大吏題請免賦弟濟字子  
雲自有傳同里吳國珍字萬九業賈性長厚年七十諸  
子欲張樂為壽國珍命以所費市巨石自篩穀涇橋下  
四十餘丈衢巷俱改築之自是早行者無傾跌之患

○汪中鵬字萬九孝子宗灝之長子登雍正癸卯 恩科  
鄉薦親病侍湯藥半載不解帶及歿當暑不扇不浴新  
安同姓子遇盜且病裸臥西關下中鵬留諸家醫療之  
病愈為具裝送歸嘗貸人銀而券落他手交來索中鵬

曰彼固有憑此實子錢家遂兩償之鳳山朱絃中鵬房  
師也令崑時邑中利弊知無不言獨無一語及私邑中  
善舉隨所見聞必竭力助成孜孜不倦卒年六十三

○唐德敏字敷民德咸季弟少補諸生講求經世務於律  
歷河渠錢穀會計陰陽靡弗通曉好聚古今異書碑銘  
志乘揭其祕要手自繕錄性耿介而能耐煩劇凡修舉  
廢墜若學宮試院玉泉井及育嬰普義等事輒殫力經  
營仔肩邑中公務者垂四十年積餼充貢尋卒

○袁士良字仲賢居渡頭里孝弟力田好施子女弟孀居  
無依授廛衣食終其身歲大水倡築隄防以捍一方發  
粟減價平糶又積粟備荒給棉施糶鄰里賴之子之炎



仁厚有父風郡守陳鵬年表其閭年八十一卒

○周楨字聚度少失怙恃事其祖以孝聞撫幼弟五六人俱得成立性好施族鄰有困乏者必周其急邑有善舉如育嬰社倉輒爲領袖所居度城與鄉飲潘廷獻俱好行其義並以善人稱

○葉本麟字惟昭自洞庭東山徙于墩兄弟同居五十年式好無間與人交然諾不欺遇善事捐貲無吝色年五十餘卽屏絕世故閉戶清修子大德好施如其父

○潘盛遇字聯五先世歙人其父徙崑山盛遇遂補邑諸生事父以孝聞諸父之在原籍者歲時存問先世貲產悉以推讓自奉甚儉而好施予給棺散棉育嬰同善無

不悉力扶助焉

○李衛字衛如性豪俠急人之難有以窮乏告者必周給之至罄其橐不顧子斐然字思裁以郡諸生食餼績學工文兼擅書法

○王南坤字南洲甬直人父鼎美性謹厚始艱嗣晚歲舉坤坤事父得歡心康熙戊辰辛未間米價昂貴出米百餘石平糶乾隆五年巡撫徐士林仿朱子社倉法坤首捐社穀五十石丙子歲饑石米五金設廠賑粥遠近德之又同里諸生朱青字淇竹嘗力請巡撫韓世琦開濬注浦幾二十里水利甚溥民多賴之

○顧登字洲士孝子存儒子少食貧以勤儉起家樂善喜

施子念族姓繁衍捐置義田五頃倣宋范氏規則籲請當道聞於 朝乞所司察如約時學宮 禮殿尊經閣頽壞泮池久淤登次第出貲興修疏濬又建忠義孝悌祠於鄉賢祠右餘如書院及橋梁泉井之屬賴以修舉者不可勝紀雍正乙卯當事以急公保薦授亳州同知尋乞休歸先是邑志自明萬厯初輯錄後至 本朝康熙間續修未竣登延諸名宿纂集合添設新邑爲崑新合志凡脩脯剗厠之費咸肩任之卒年七十七子敞字宏開例授州同知世敞字貢來少好學能文章尤工書慕文徵明之爲人由監生例銓翰林院待詔入棘闈十九次卒不售楷法師率更行書師衡山風骨堅蒼落紙神似顧不肯署贖款曰此不可以辱我先賢也

○唐琦字蘊奇德宜子出後世父德咸弱冠補新陽諸生嘗勦嚴園義冢於留暉門外乾隆甲申開鑿越河以出土遺骸葬其地庚寅夏修葺學宮琦經營最力復於至聖諱日誕辰偕諸生釋奠於玉山書院會兩邑版荒升科之議起藩司以屬崑令郝瓊瓊集紳士謀琦力陳低瘠田蕩所獲甚微一經升科民必棄之必至官民交病瓊悅令屬稿以覆事得寢生平博雅嗜古尤精堪輿家言卒年八十一子鬻單縣主簿容緒新庠諸生

○梁鳳岐字從冲五世祖世倫始居邑之北新塘鳳岐好學工詩補郡諸生性孝友輕財重義隣近新塘柳沙二

橋歲久圯壞力為新之乾隆己卯歲大灾道殣相望新陽尤甚出粟周給里黨全活多人居閒輯先正格言教後進學者稱之子萬九諸生

○陳錦字席珍武庠生居木瓜涇之景巷涇多支港病涉者衆錦前後建橋十三皆以福字命名稱十三福橋行旅便之兄鑑字西藩亦好行義嘗開通潘曾浦之長浜直達雞鳴塘自茲行舟不復患迂道云

○朱汝楷字杏瞻讀書好善凡助人嫁者四成人婚者三延師課其子供億必豐脩脯必厚體察周密忠敬久而不渝邑令康基田調任昭文邀之至署曰非以簿書煩君欲借君老成端重坐鎮一切耳子三樹鏞字孟遠乾

隆壬午舉人廣東大洲塲鹽課大使樹籥字仲和力學敦行貢成均未仕卒樹輦字叔儀幼警慧能文弱冠領庚辰恩科鄉薦授新城知縣調吉水終順天府經歷

○王宗字皓山邑諸生產僅中人而好行義乾隆元年邑令劉鶴以馬鞍山後入官地收葬暴露棺骸四年又於城北更設義冢前後所葬凡數千案皆首輸貲力任其事他如剏修魁星閣開濬玉泉井捐立社倉率倚案以辦其後好義與宗略相等者諸生諸秉源秉源字元萬尚寶卿壽賢七世孫性篤厚一故家子死暑月貧無以殮妻旋殉死詳列女傳秉源並為棺葬以其二幼孤令鄰婦字之而資以粟念類此者不少乃糾同志剏施棺局規

畫詳慎迄數十年如一日秉源子忠孚字虎臣髫歲能文有神童之目遊庠受餼後頻躓鄉闈未中壽而卒

○薛學敏字啟源少補諸生精醫理遇貧者給以藥且量資之活人甚衆乾隆元年邑人王棠倡普義園瘞暴骨學敏時主其家力贊成之後與同里諸生吳鏡初建永安局其葬埋規條一如首義領甲子鄉薦未仕卒年七十鏡字克明孝子常之孫少善屬文連試冠其軍生平喜網羅舊聞遇前賢軼事邑乘所遺者纂輯成編題曰可信錄性尤倜儻好義永安局既倡興復東西義冢學敏已卒一切經營奔走皆鏡之力也

○孔傳泗字英卓太學生父毓璧早歿撫兩幼弟俾成立所居孔巷相傳孔氏遷崑之始故有宗祠傳泗就祠旁設義塾以教族姓子弟又與宗人整各捐常稔田為義田上其事於司農資世守有故人宦江右負官逋而病上官持之弗令歸傳泗聞之挈貲往為之經紀并治歸裝未嘗形德色子繼泰字鶚瞻乾隆丁酉以選拔入成均喜賓客嗜法書名畫潑墨作山水得宋元人筆意

○支鳳崗字德章監生候補縣佐好施與乾隆二十年歲饑捐貲賑濟設廠施粥無吝色當路高其義行給義敦梓黨匾善事親親或不悅必長跪求解親顏霽乃起弱冠至外大父家見舅氏兄弟爭論苦口勸之不聽即前跪曰兩大人不和好伏地不起矣道遇尊長必正立拱

手俟其過乃行中年以往無嗣爲善益篤六旬外舉一子登信太學生樂善好施如其父又陳墓鎮人陸學堅監生亦好行善里中善舉無不與嘉慶十九年舉鄉飲賓署崑山令艾榮松獎以年高德劭匾道光三年大水災平糶賑饑心力交瘁知縣馮秉泰復給以惠普梓里匾獎勵卒年七十一

○方復字思行邑諸生知醫好義嘗著戒火葬說偕同志倡永安局收瘞暴骨冒風日走叢冢聞督視及疾革誠家人曰吾死葬吾於義冢以解世之恥葬義冢者

○鄭思怙字志瞻太學生世習醫思怙益精其術性好施家無擔石儲而周急濟困常若不及乾隆丙子邑大疫

思怙門如市貧無力者給以藥轉予之錢所入多隨手盡戚友有以匱乏告者輒不俟其言而畀之無不慚其意而去子淦字士華亦太學生精醫好善有父風

○湯鎮字靜安太學生居裏巷少孤善治生天性孝友尤勇於赴義族有構宅爭地而鬩牆者旁爲鎮地鎮立召與之曰毋俾後人議爾薄也里之南橫塘橋久圯需費甚鉅鎮慨然首任或語以形家言橋成恐不利於君鎮曰吾自爲千萬人病涉計耳他非所知也

○柏廷謨字明遠幼讀書未就爲縣從事嘗疑一死罪陰詞得實白長官雪之卒未嘗以語人逾艾引退於利益地方事輒殫力助成故家子貧乏無告及孀婦老病無

依者調卹恐後生平每勸人息爭遠近咸稱長者云  
○徐文奎字聚五順治辛丑進士與喬元孫崑庠生鏡子  
補諸生鄉舉不遇治生產家日裕事親能得歡心鍾愛  
異他子性忼爽饒智計自奉儉而好施邑有社倉胥吏  
侵牟過半首倡捐穀五百石道光癸未大水民饑賑粥  
平糶助不給夏施藥冬施棉歲以爲常又念族姓繁業  
儒患貧做范文正遺規立義田購莊屋祀遷崑始祖以  
下主事甫議舉而文奎病疾革遺命割膏腴產五頃贍  
族卒年五十子寶符瑋詳請憲題奉旨准給帑建坊  
旌表初族高祖相國元文有遺屋典他姓贖歸居之建  
閣於其西題曰溪山清賞課子讀書優游卒歲寶符瑋

別有傳

○朱大松字萬梅宋徽國文公裔孫明季有應聚者業質  
遷由婺源卜居崑山遂入籍爲大松六世祖祖崙父受  
觀伯父受謙無後以大松爲子嘗訓之曰居家毋奢行  
善毋吝兩世皆好施大松遵先訓自奉約而勇於爲義  
嘉慶甲戌知縣王青蓮修城倡捐協修道光癸未大水  
窮民行乞於路大松飢者食之寒者衣之又捐米數百  
斛協賑昭文縣災黎縣志七十餘年未修恐文獻散佚  
延邑中耆舊王學浩吳映奎邱以澄張宗城等設局分  
纂一切薪水修金獨力捐辦費五六千金就正吳縣先  
達石韞玉序以梓行立義莊建祠其中撥田千畝有奇

濟貧族詳憲題請得旌如例凡修橋平路築閘浚河及  
普濟育嬰散善各堂務不給皆出貲飲助以例貢議敘  
縣佐道光壬寅八月卒年六十有六

○晉大鏞字若靈其先世於元時由山右遷崑遂占籍明  
嘉靖癸未進士台州守憲大鏞十世祖父旭濤忱爽好  
義鄉里推重大鏞由武生援例入監父卒母哭之哀日  
告百計求醫罔效事之惟謹迎養寡嫂撫從子女如已  
出戚黨病者醫藥之歿者喪葬經紀之無後者爲置後  
擇師訓之癸未水災歲大饑知崑山縣事馮秉泰高其  
行誼有幹才延董賑卹事酌定條約勸募人皆服精勤  
周密不可及縣以名報績堅辭馮曰勤苦如此不欲表

祿爲君計則可如無以示勸何且牒已發不可辭也旋  
得 恩旨從優議敘縣佐大鏞於地方善舉無不倡導  
卒之日無遠近親疎咸泣下至有慟哭者年四十八大  
鏞子四人仲子邦基廩生好學工詩文性狷介慎默授  
徒自給遇粵匪難避南鄉憂憤卒年五十二

○俞曾燮初名授曾字傳伯祖雲耕雍正壬子舉人官廣  
東長甯知縣父恩來增生燮少承家學爲諸生有聲譽  
同里朱叔鴻篤行君子也嘗稱曾燮坦夷和緩與人交  
忠告善道遇不可相爭至面赤卒不忤與陸逢甲友善  
鄉賢明陝西僉事贈副使陸冕嘗劾方士陶仲文忤旨  
謫官爲逢甲十世祖墓爲夏某侵佔廉得其事告逢甲

逢甲懦慨然謂友人王嘉會王鳴鳳張潛之曰副使以直諫遷謫先民之望樵牧侵及兆域後死者責也非訟之官不可君等其共助之皆曰諾遂具牒之官墓得不毀而夏卒還侵地其勇於爲人果斷不惑類如此卒年五十二

○王嘉會字仲亨父琳字耀昆歲貢生以學行爲鄉祭酒嘉會與兄嘉俊先後補崑庠生爲文務宗理法不作時俗軟媚語歲試拔優等食餼性坦直或面斥人過不稍假家僅中人產好施與不足告貸以相賙然往往爲人所負夷然不介意也會武生方某爲縣尉辱士論譁然嘉會素識尉爲言薄懲其役事當解尉被酒以嘉會爲

侮已懇諸縣由縣達大吏大吏不察褫衣衿下獄知嘉會者咸惜之且訟其寃事旣白循例入太學嘉會狀貌充然偉鬚髯規行矩步後輩皆憚之學本朱子小學近思錄持儒釋辨尤力事親孝色養備至嘉俊早世遺孤五人教之成立道光癸卯年六十卒

○金承烈字紹周世居石浦父玉立始遷於邑精瘍醫承烈繼之求醫者如市應手輒愈而不受人值性慨爽一諾千金道光癸未大水路多餓殍承烈惻然傷之出貲創建普濟育嬰堂男女號房四十餘間並捐田二百餘畝偕同志夏溶顧之蘭勸募以養窮獨收棄孩而哺乳之道光己酉水災經費支訕承烈子履基接辦又偕溶



姪某勸募給發全活甚眾溶字渭川增生明太常卿景裔孫工制藝善口才兼明醫理尤精法家言時設善普育同時舉設善意兼保富普育全係濟貧溶循歷四鄉苦心諳勸擴田至數千餘畝推廣儒寡恤發計口按日給錢窮民無告者均賴以生省蘭字廷佩增生明大學士鼎臣裔孫普育規條均出其手佐理三十餘年無倦容道光二十五年例得重游泮水邑人請不應又三年卒年八十六

○胡濤字濟美充新邑戶書掌賦歛時漕弊叢生吏役視爲利藪充此職者率家日裕置田產屋宇濤獨力行善事寒者衣之饑者食之婚嫁無力者助之喪不成殮者

賻之遇急事至以所納公家錢與之自質其衣飾以輸官元旦日有衰經叩門求助棺斂者家人怪叱之濤適空匱典質資之且曰今日第一日作第一事便是大好事此天賜我也每屆歲除探知實不能度歲者袖銀微行陰投戶內鄉里咸德之喜爲人排難解紛有不平爭論事得濤片言憾俱釋老幼敬服其陰行善常如此自奉極儉約衣布茹蔬老屋數間終其身卒年七十餘

○姚庭昌字桂林三歲喪父事母孝家貧執刀鐮以養衣做食粗奉母必有酒肉母思食鱗魚時一尾值數百錢庭昌窘甚傍徨河干客見有欲得之色詢知其故卽擇肥者餉之終身感焉母患臄疾病篤刲股和藥進病良

愈逾三年歿庭昌已生子坤坤七歲妻卒誓不復娶坤就外傅晨夕督教奉先生必誠必敬中年有率錢爲會者其家被焚不能償有訟之官官問庭昌曰若亦會中人某負錢何獨不言庭昌頓首謝某不幸被災非心負也民雖貧實不忍索一錢且人多財何爲將獨爲子孫用乎令見詞氣慷慨命皆具券弗責償令旣異姚遣人達意欲見之謝弗往迨坤補新庠生執技如故道光辛丑三吳水災新陽尤甚守將維揚劉淮率邑之善士爲粥以食餓者庭昌亦出貲助賑貧而好施人多難之是冬卒年六十

潘道根有傳

○陸燦字振寰新陽監生居邑之毛厓村少好武得吳戈拳臂錄悅之習練鎗棒力能敵數十人居心忠厚里中有善舉解囊慨助無吝色援例授千總職道光己酉邑大水捐貲平糶立施粥廠不足商之吳縣友人汪正復得正所募銀竭力籌辦飢民得生無算傅中丞繩勳給善行克散扁額獎勵咸豐末粵匪變作巡撫徐有壬保舉加守備銜札委探高郵溧水軍情及郡縣失守復捐貲募勇數百人設局長浜天燈菴偕把總許錫昌誓共殲賊歷數月家資幾罄遇賊受傷自知勢不可支憂鬱患目疾常切齒椎骨以未能滅賊報國爲恨同治三年卒年六十餘

○吳再錫字光甫崑庠生平生重然諾輕財幣每關心邑

中善舉晚歲棄教讀業辦公嘗與李傅霖勸募紳富捐貲創立文會局廣書院膏火立籌濟局濟窮民度歲米監修文廟早出晚歸終年無倦容又修建祠宇若五貞崇賢及顧亭林祠無不購置田畝爲香火修葺費道光已酉大水田廬淹沒饑民滿道接辦撫卹任勞任怨盡心籌畫事竣兩邑合詳請獎勵議敘以訓導試用陳學敏原名如新新陽歲貢生舟直人性好善於里中創立義塾及保嬰會咸豐末兩次募捐留養六合等縣難民同治五年江北饑又募捐留養災民學敏不惜艱辛實力辦公崑山縣張潛給樂善不倦匾獎勵

○顧運銓字秉衡號桂曹世居夏甲村祖德宏本生祖道

宏父有光本生父有倫皆以善行稱運銓生平尙肝膽過善舉踴躍以身任幼讀背誦如流稍長棄舉業入胄監援例爲府同知父歿盡喪葬禮建宗祠置祀田母汪年高侍不離側所居旁築逸園時奉板輿遊覽其間顏園廳曰春輝草堂道光癸未大水創捐賑飢設厰平糶兩邑寒素士應秋闈試艱斧資創捐田百畝爲闈費局好義者遂踵成之又創建里中廣善堂規畫井然其他橋梁道路歲有修築悉承祖父志暇餘學書畫以自娛年五十七卒

○張廷俊字額門國學生邑之夜區十圖人性儉約而好施與道光癸未邑中水災出資救饑不遺餘力地隣谷

澤塘爲東西往來孔道捐資二千餘緡起建石橋至今  
賴其利割膏肥田五百畝建立義莊以濟貧族好獎掖  
寒士遇貧不能應試多方資助邑中創立敦善普濟公  
堂廷俊捐資倡率以上壽終子式模字笠帆國學生稟  
承父志道光己酉又大水邑經癸未水災後元氣未復  
更困重賦室鮮蓋藏式模承辦東鄉八十二圖勸捐平  
糶戴星出入設廠賑粥歷十閱月全活無算咸豐三年  
髮逆竄踞金陵勸捐助餉首捐千緡爲一鄉創爲人和  
鬻可親喜排難解紛遇有兩造爭執經數語調停輒渙  
然冰釋善堪輿精數學同治初寇平蘇省開輿圖局檄  
下兩邑知縣張潛諗式模能延司其事式模用立竿取

影之法道里之遠近山川之形勢周歷城鄉半載圖成  
凡邑境與隣邑接壤處筍合不爽累黍邑故有魚鱗册  
籍兵燹後大半散失邑之東鄉斗則輕重不一里書計  
圖影射糧額無稽式模議均糧法分上中下三等辦賦  
徵輸遂有把握管謂兩邑步弓較小於鄰邑康熙年間  
以田就賦有縮弓縮縮弓名目以後清丈自應恪遵部  
頒六尺弓爲式庶小民永除有賦無田之累癸亥邑城  
克復後滿目瘡痍發千緡以撫卹災黎又捐田五百畝  
歸普濟育嬰善堂周紿匹窮爲久遠計其不惜巨資以  
急公類如此

○許春霆字餐霞新庠生居邑之張浦鎮尙義好施置義

田以贍族訓子弟讀書井井有法以貢授丹陽司訓卒年六十三著餐霞吟藁曲阿小草張浦紀聞各一卷弟春靄春藻春靄字萊峯新庠生早卒著續宅京記潘道根序之春藻字雅堂郡庠增廣生尙義如春靄晚年究心內典自號覺空卒年七十九著有評月草堂課藝覺空詩稿春靄子溟淦議敘縣丞里中諸善舉助貲力行淦崑庠生亦好善春靄子爾斌爾耆爾斌援例爲布理問爾耆新庠生議敘縣丞均以行善稱春藻子星福戩穀皆諸生爾耆子倬字雲章性誠樸閉戶課讀積餼貢成均卒年六十四

○朱惟沅字晚夫號九蘭世居陳墓鎮孝廉方正綱子邑

諸生素性好善主里中崇善堂事創建義塾並保嬰恤癈會及忠義節烈兩祠置舟設義渡二處皆首捐財產創爲之不足則棄產典質以成其事嗣董城中善堂事釐剔積弊時適兵燹後親至申江遷崑民避寇時骸骨四百餘柩歸擇地理之凡三年百廢具舉以得薪水錢五百餘串爲兩邑造忠義總祠於城中旋入貲爲浙江鹽課大使需次八年困貧如洗而樂善如故人有急者輒周之年終例得貧員度歲金潛出視鄰民無告者散給之光緒四年河南大饑浙中官紳議集資助賑惟沅與同人偕往饑民賣鬻子女傷心慘目入汴先辦代贖婦幼事新安澠池兩邑災最重謁豫撫請往計賑饑民

六萬餘口掩道殫無算又為新澗兩邑各開渠數十里  
使得漑田設善堂立義塾兩邑故孔道民困於差徭為  
購置車騾若干乘撥款備公費擇紳士董之言之縣自  
後車騾毋得索諸民甚便之事畢辭歸積勞成疾抵  
里遭仲兄成勳喪痛切鴆原尋卒年五十六

藝術

宋

毛松善畫花鳥四時之景子益乾道中畫院待詔工翎毛  
花竹渲染生動似欲飛鳴有黃鸝出谷荷塘柳燕諸圖  
傳世益子允升景定中亦畫院待詔能世其業  
老戴學趙千里林木山水可追蹤趙大亨衛松世稱老戴

而逸其名

元

張心田善書畫

見佩文齋書畫譜。郭翼與顧仲瑛書以心田與虛白並稱舊志失載

陸德潤字仲德好陰陽星厯之學嘗客江西得祕數益推  
極其說節殊脈貫使不肯於理學者躓之然頗自祕惜  
不輕語人為入簡潔有信義退然若無能者與人交久  
而益善

朱玉字均璧先世自江右來徙玉喜繪事聞佳山水每脩  
然獨往不遠數千里仁宗朝永嘉王振鵬以界畫稱旨  
玉從之遊盡其技至順庚午奉命金圖藏經佛像方不  
盈矩曲極其狀意度橫生不束於繩墨人言振鵬不之

過玉內行脩潔薄於利欲年既老猶精謹如壯者嘗作紫霧龍宮翠蓬神闕二圖十年始就妙入神品藏之家時有虹氣貫月楊維禎爲作虹月樓記卒年七十三

宋尹文字文璧父祐海道千戶尹文幼好學薦爲翰林院檢閱官學琴於秋山徐氏得正雅之傳魯國長公主聞其名召至奏胡笳十八拍公主憮然曰其意悽惋有放妻離子之悲何感人之深也命左右賜白金百兩後歸老報本寺精六壬遁甲之術推測休咎多奇申云

周仲高精天文地理之學遊四方廣山大川觀陰陽之會徵休咎之符時方承平白錢塘來崑山曰天下兵且起吾卜地莫如婁善遂居焉已而錢塘燬於兵而崑山無

恙人皆避之崑山自縣衙及宮寺神宇相方定位卜日揆辰皆出仲高手

朱煥常精醫所投藥無弗效急義強仁不責厚報遠近求者踵至州人王孟章之母中秋暑憤亂勺水不下衆醫辭去煥常一劑而甦孟章乞殷奎文報之

王時字景南博學好古精篆隸章草六書源委無不洞曉盧熊深稱美之

劉國瑛軼其字精於醫術壻胡子雲朱通甫得其祕方密旨亦爲良醫

朱珪字伯盛篤學好古從錢塘吳睿學書凡三代以來金石刻靡不規倣久之盡悟石鼓嶧山碑之法篆畫摹刻

爲吳中絕藝凡朝廷制誥詞命與公卿大夫家誌銘碑版一時多出其手會稽楊維禎作方寸鐵志以贈珪嘗取宋王順伯元吾衍趙孟頫諸家印并吳睿所書及自製印篆纂爲凡例曰印文集考又摹吳睿所書說文曰字原表目珪清修寡欲讀書十年不下樓五十不娶條然有出塵之趣自號靜寄居士

明

沈希遠山水宗馬遠亦善傳神洪武中寫御容稱旨授中書舍人

王履字安道學醫於朱彥修盡其術嘗以素問云人傷於寒爲病熱言常而不言變至張仲景傷寒論推明寒熱之故實爲諸家之祖然三百九十七法中不無脫簡重複於是釐爲二百三十八條備常與變極論內外兩感經旨異同并中風中暑諸證曰沂洞集又作標題原病式一卷百病鈞元二十卷醫韻統一百卷履少篤志於學博涉羣書爲詩文皆精詣有法畫師夏珪行筆秀勁布置茂密洪武初挾一僕走秦晉遂登華山絕頂見奇秀天出歸爲之記得數萬言并繪圖四十各書紀遊詩於其上由是畫學日進人問故曰吾師心心師目目師華山後爲秦府良醫卒子伯承能世其業永樂中醫名噪兩京無子傳之壻沈仲寔仲寔孫承先亦善醫邑令方豪以其愈母疾書助孝二字贈之



沈貞字士怡宋宣和六年狀元晦之後自浙遷吳精於醫志在濟人未嘗嗜利患傷寒難治因以張仲景為主取李浩或問郭雍補亡由漢以下凡論傷寒者哀集成傷寒會通吳下諸醫謂能補仲景所未備子方別有傳

許律字用韶父矩字仲方元醫學教授精東垣之書治病以固根本為先不取效於目前而活人特眾律得世傳之祕凡人疾一經診視生死立辨人以為神弟度字用衡量字用廣並以醫名又同時董伯儒與律為內外兄弟醫學同出一門伯儒淳質無偽脈藥甚精授醫學訓科子士源曾孫愚世精其業

許謙字元孚其先鑿江人宋南渡時徙於崑少從王履遊

博通儒書深造醫道所著詩文名野情集無子以其學傳之婿陶浩浩字巨源少業儒傳謙之學能起奇疾求療者日眾性素清儉有聲士林

范暹字啟東有孝行善畫花竹翎毛永樂中入畫院博識有談論公卿多重之供奉三十餘年老於京師人稱葦齋先生

徐壽字同文嗜讀書工醫卜祖伯興為元崑山州學正因家焉長子發有孝行季子牧領宣德己酉鄉薦官嘉善教諭兩典河南福建試孫旦金山衛訓導

夏昂字孟暘景之兄精書法初以諸生被選與修大典書成授永寧縣丞被誣謫戍大學士楊榮薦書釋典擢中

書舍人母老乞歸昂性冲澹與人交恭敬辭遜不擇便

利善繪雲嵐樹石得意處不減米芾高克恭云致仕家

居垂二十年卒年七十八子欽字克承錦字德文並以

齒德重於鄉

按張大復傳錦子津字時濟家貧好學以

作記垂戒歷知象山昌化二縣皆海陬難治津一以慈

惠治之以疾歸卒浙泉徵檄猶日至焉欽元孫禹功字

九叙禹錫字九範並為名諸生禹錫尤好古文

詞為歸有光高第弟子著述甚富以老壽終

顧文榮字仲華家世饒裕洪武中徙實京師後以母疾博

求藥理遂精於醫隸太醫院求治者無弗往往輒效性

尤任俠調人之急惟恐不及沒後楊榮為表其墓

何順中先世自曾祖子雲以下俱業醫至順中益精官太

醫四十年王公貴人延之者必尊敬乃往以勢臨之弗

能致也又葛哲字明仲世業儒尤精醫藥以薦授荆府

良醫所著有保嬰集上之朝弟睿亦善醫時稱二葛

周公冕精九數之學預修永樂大典授詹事府通事舍人

出為饒州府照磨卒官又陳林南官越府良醫正公卿

達人咸折節與交以詩文酬贈

張翬字文翥善畫山水宗馬夏弟翼字文翔慷慨尚氣節

善書宗歐柳嶺北諸公廨及溫泉題壁甚多大者至如

方斗其書龍門諫院題名記尤為超偉

屈昶字處誠受寫竹法於夏景粹未盡技景喜醉後揮灑

一日昶張縑素於壁而飲景酒既醉輒馳去昶乃縱意

潑墨作風雨竹數竿他日景見而訝曰吾何從作此昶

以酒酣對景諦視良久曰醉也取筆埽數葉其頂覺雨驟風旋竹情頓活初自念寫竹無以過景去學松遂臻神妙間作枯木竹石簡遠有王絨筆意孫儒別有傳又吳獻字惟貢畫竹師夏景李郡亦工畫並知名於時周號字德元工篆隸碑碣題署多出其手寫梅尤超絕性高亢成化中嘗以賢良徵不就彈琴賦詩以終其身同時吳豫字心田父號默田翁師事屈昶得畫竹法其佳者直與夏景抗衡豫亦善畫竹灑然有致

莊樂字伯和居磧礪里精醫術能起奇疾與葉盛友善盛在朝日同官有疾輒曰恨不得我鄉伯和治之樂天性灑落談笑風生萬石長李庸遣价詣樂誤舉姓名給之曰若翁欲借藥磨耳附片紙曰面呼姓名罰駝藥磨兩回庸得之大笑令負還其風致如此子允恭誠實不欺亦以醫名於時

周振譽字彥聲先世居春陵七世祖律家崑山世業醫至振譽益精其術正統初徵入太醫院擢楚府良醫歸老於鄉治危疾多奇效子裳克世其業

支鑑字汝同性整潔塊坐一室日就窗几界烏絲欄作小楷百字得鍾王之妙爲夏景所稱賞其書宮殿墟墓碑榜莊嚴勻整無異小楷間畫細篠澗蒲頗極幽致又有項拱辰字惟忠亦善大小楷書

陳光遠成化中居安亭里醫術神異所善客子痘殤將納

諸樵光遠偶過視之曰而子不死取沙遍壅其體令旁羅擊鉦鏡之屬良久兒漸動活矣客問故曰兒苦水痘無力自達得土氣乃疏金爲水母鳴則水應而出也御史行部而病召視長揖不拜且索坐旣診脈曰無疾第往時病應服補中湯二十劑灸臆中二十壯乃瘥僅及半所以復發耳滿之而愈御史驚以爲神他日造其廬茅屋三楹不蔽風雨欲葺治之固却乃止光遠所至有奇效遺以金輒不受隨身佩一金牌鐫不近女色四字後不知所終

李元壽字仁山善大小楷書尙書王恕撫吳時見其書聘往呼爲李生按部必攜與俱啟牘箋素悉出其手或舟行無事則令誦大禹謨皋陶謨而莊聽之又爲御史顧潛寫進奏書朝廷稱善元壽淳篤謹慎以是紳士重之盧志字宗尹少講習素問難經洞悉包絡淹通諸家之義應詔至京過徐沛間遇一異人短篋敝笠與論運氣主客正對之法大有會悟就禮部試擢太醫院判供奉御藥房孝貞皇太后昭聖皇后有疾診視立愈賜繡衣一襲宮中呼爲盧鬍子已授御醫賜金綺三品服武宗南狩還不豫召志診視志趣告諸大臣言冬得夏脈於法不治願定皇儲安國本侃侃關宗社大計尋致仕志談脈理獨明標本年踰八十衣冠皓偉掀髯話生平治疾事津津不置子榘嘉靖乙未進士官兵部員外郎

周侍虞美鬚眉善談笑以醫術擅名又精度曲與魏良輔遊旬日曲盡其妙行義斬斬有古人風素與凌公子某善公子貧座客皆掉頭去侍虞歲載錢米與之性好施予平生活人無算壽至九十餘

盛徵伯爲人亢直負氣博通醫術治病不爲藥劑但書方與之授徒海上數里之內無病死者後居齊門治疾多奇效一婦人已死徵伯爲湯灌之便覺身動能舉手須臾而愈人皆以爲神

倪世瑛字伯遠善繪事臨摹名蹟直造能品好遊名山水觸目會心畫益奇妙遇俗客則輟筆不爲

張大年字世長大復弟書法趙孟頫尤情於畫從諸名家

游獨喜摹唐寅筆家貧善病性任俠不肯鬻其技

鄭之郊字宋孟博學多識尤精醫術匕匙所投無不立效嘗應聘至三邊道墜馬受傷夜夢雙髻羽衣者投草一束曰是可立愈前途廟中有之急行憩神農廟神像宛符行其庭果有是草以敷傷處遂愈天啟朝徵授太醫院吏目療疾多奇效進秩御醫魏忠賢招之視疾辭不赴尋告歸修先世墓新五貞祠鐫格言勸世弟之祁字宋叔淳篤有孝行兩舉鄉飲乙酉城破被難

李逸字斐石性好佛尤工畫佛嘗依淨土經畫九品往生圖莊嚴妙麗窮極相好崇禎辛巳歲大饑餓孳塞路逸繪飢民圖請於巨室作粥賑之乙酉秋與衆守城城破

更僧裝入鄰菴遇兵死之同時姚曦字元暉工畫花鳥  
戎裝守城城破死亂兵手

陳伯時邑廩生善騎射精天文奇門太乙六壬兵家言明  
季見天下多事奮欲以功名顯竟不遇以老

國朝

○周維墀通志作穉字仲肅幼患咯血棄儒習醫從海虞  
繆希雍遊盡得其傳薦授太醫院官順治丙申總督郎  
廷任繪海上全圖駐崑標兵爲民累適郎病延維墀治  
數劑而愈維墀堅却厚饋請戢卒伍邑遂安年八十無  
疾終

○潘澂字弱水畫師黃公望沈周酒酣放筆高巖古榦盤

鬱淋漓明季與歸昌世許夢龍沈宏先張檟桂琳張檉  
張宿徐開晉顧宏許瓊龔定姚曦十三人結畫社各肖  
其像題曰玉山高隱澂負氣誼不屑以藝自鬻學博呂  
兆龍呼優人演劇尊經閣後結綺樓環數十座澂夜約  
同志持炬焚之守者問誰曰我潘癡也由是潘癡之稱  
遂著 國朝順治甲午赴給諫季開生招開生以言事  
徙遼左澂樸被隨之居二載開生促之歸畫益奇放自  
言我從冰山雪窖中來筆下殆有神助明年以經紀邑  
令郭文雄喪感疾卒弟子蔣聚及子東畫並入古

○陳祐字君祚世居干墩工傳神好飲酒鄉人號曰陳癡  
順治己亥湖寇肆掠祐負其父伏田中夜半遇一賊祐

奪刀斫賊俄衆賊擁一魁至稱王將軍執祐父子將殺之祐請以寶獻導賊歸指一篋曰寶在是啟視乃大硯一銅鑪二破畫十餘幅而已賊大笑曰君豈癡者耶祐曰然予固寫生陳癡也賊曰試寫之祐運紙砥筆目視賊魁不轉瞬賊脅以刀祐曰我不卽畫者所以傳將軍之神也甫下數筆賊衆皆曰肖於是父子皆獲免

○李爲憲字匡吉可汧孫以諸生入北雍投旌德教諭擢通許知縣憂歸卒爲憲爲太倉王原祁甥童時作樹石粘壁原祁見之詫曰昔松雪與山樵甥舅相傳俱成大名家茲其踵美乎攜之邸舍幾二十年原祁追蹟古人名傾當代爲憲得其真傳一時有王李金曹四弟子之目

謂王敬銘金明吉曹浩修及爲憲也

聖祖皇帝嘗詢原祁代筆者以爲憲對嘉賞不置後之官公餘揮灑得者如片璧子豫得字汝通亦工山水能世其學同時盛燕字翼山師事爲憲筆亦適邁

○鄧倫采字玉如精書法亦工篆刻處士梁逸雅擅此技視他人少當意顧獨推倫采贈詩有銀鉤全八法鐵畫又三橋之句同里汪洋稱其品行修潔有鄒魯諸生風又王樂字奐之精篆刻所著印存論者謂深得古法云  
○顧卓字元章諸生畫師虞山王翬得其具體筆墨深秀精到處與翬幾出一手

○張同字揆一善花鳥陳孚字子實善墨梅宗法徐熙陳

逸字韜文亦善墨梅放筆淋漓縱橫盡致卒年八十餘  
○方國圻字南公性傲嗜酒善寫竹力追夏景後有馬良  
字天錫法明初宋克竹石蒼勁自爲一格性和藹好施  
予雖傾囊弗顧寓居郡城卒友人朱之瓚葬之南園  
○邱龍門字子登諸生善章草後有陳賡華字夢承書學  
董其昌時有逸處

○姚源字澄千畫師顧卓喜摹王翬稿本不踰繩尺而氣  
韻生動別具煙霞之趣又從歸莊學書私淑震川卜居  
金潼墓旁垂三十年性嗜酒家貧不能得日以畫質酒  
肆歿後無嗣長縑巨幅多在沽兒手同時有呂啟哲者  
亦嗜酒間寫人物時得天趣

○馮翊字漢來善丹青尤工寫照嘗應衍聖公招繪聖蹟  
全圖變化萬狀兆之都寫漢宮春曉爲畫院所稱後有  
邱巖字魯瞻亦工寫貌用筆簡潔

○章法字石渠善畫牛亦工畫菜用墨五十年淺深燥溼  
能得其祕冷面蚪髯間作詼諧聞者絕倒

○徐晟雅字穉雲昂發弟畫山水宗元人法湖邨洲渚煙  
雲竹樹極蕭散之致又有錢贊字世臣畫宗范寬黃公  
望作海上乘槎圖有繪水繪聲之技

○顧茂字相實錫疇曾孫少受業於朱用純長遊山東補  
萊州金州衛弟子員尋受鍊工書法真行氣骨堅蒼出  
入於率更南宮之間一時邑中碑牘出其手者爲多嘗



作廣惜字說戒世之不敬惜文字者言極警切

○鄒祇謨字紳佩真義人父順全本鐵工善製器康熙中滇中用兵應募往凱旋膺賞賚命祇謨讀書脩脯豐厚旋補諸生受錄祇謨具文武才嗜酒尚氣不可一世工臨池行草書尤有晉人風致卒年四十七

○徐傳毓字子山乾學會孫邑諸生以例得官終武昌府通判能詩兼工書法尤善寫生筆墨工細氣韻閒雅然頗自矜貴不輕為人作

○高愷字元祐家吳橋精六書篆籀時虞山林皋以刻印名愷謂此牛鬼蛇神也獨以秦漢古體與之樹幟名噪燕魯間後應粵西開府聘卒於粵無子又有朱遇韓者

篆刻宗文彭倣張灝學山堂印譜輒神似人爭重之

○孫淵如熟張仲景書凡金匱古方人不敢用者淵如用之輒效嘗醫黃潭錢某曾有留飲作痛用甘遂半夏湯內有甘草錢詒之曰甘草甘遂相反並用何也答曰正取其相反攻擊以去病根耳服之腹大痛吐泄交作痰飲盡除十年痼疾一劑而愈

○吳道隆字奉泉先世本浙人王姓明萬厯間父默幼隨其父彭遷邑之車塘有吳橘泉者撫為子補諸生入太學因冒其姓橘泉嘗遇異人得治瘋祕術試輒驗道隆益精其業求治者至不遠千里子僚字履常僚子山字心重並讀書有文采山尤擅仲景術兼工篆隸及畫蘭

康熙中邑令程大復徵舉爲太醫院官辭不赴其後子孫至今猶以治瘋名於時

○俞補臣精方脈治病必求原本著醫宗指要多所發明又有胡嘉字含章善醫不嗜利子瑤亦以醫稱舉鄉飲父子年皆八十三卒又周元幹字復初邑諸生精醫不名一科臨證辨析微芒屢著奇效有朝紳欲爲元幹道地補一官力辭而歸

○趙天潢字潤周自東洞庭徙崑性豪邁善醫嘗之海外多用外臺古方治病名稱於時又趙方郭家藏祕方治傷寒最驗

支東雲世治痧痘有神效子之麟諸生亦精其術又有

朱鉉臣以幼科著後姚介眉呂紹聞並以幼科稱又瘍醫俞汝翼居家孝友治病不計利亦稱於時

○陳涵字學淵明嘉定守鏞裔孫嘗遊燕齊楚粵足跡所至徧訪山川景物賦詩作畫天趣橫生又善度曲古調新聲拍板揮絃聞者心醉

○曹吳瀚字漢濱邑諸生工書善屬文天性孝友以先像失真伏而思思而泣泣而廢寢食累日乃搦管臨摹形似而神非泣如故遇畫師叩其用筆皴染之法積三月頓悟頃刻成兩像畫師見之咋舌自此遂以寫真擅名○張其堅字愷六國子生善畫葡萄入妙品求者屢恆滿戶外子廷鏞字廣和爲諸生有名善書畫以客遊死

○馬中驥字驥北幼失怙母命習醫遂以醫術著求治者無虛晷應字輒效嘗以慈谿柯琴所著張機傷寒論及論翼二書于多謬訛為詳加攷訂刊行卒年七十餘門人周樹五字開稷得其臨證察脈之要最知名

○趙蒼舒家濫瀆邨世業醫蒼舒尤精治傷寒與馬中驥齊名而各不相能然蒼舒貫串諸家援據確實中驥無以難也弟律黃亦繼起有聲於時

○唐球字震夔邑諸生體瘠而饒幹力工書善射兼通內外丹術及篆刻之技同時倪泰符葉葭鎮人猿臂善射兼工劍術

○吳麒字茂承善寫真尤工花鳥子洵字錦文亦以畫名同時又有徐昉字德昭以寫意花鳥著稱

○何斌字覲揚少嗜書法居趙靈邨從澧州倅長洲姚浩學臨撫歐陽率更醴泉碑結體閒架不失絲毫有九十字書法同邑戈定為鐫石以傳以積餼充貢卒

○陳德昌字懋恆國學生其先自郡徙崑世習幼科至德昌父立方字振恆尤擅名德昌性和厚治疾多效孩穉不能任藥者婉詞曲誘務盡匕匙遇危證焦慮凝思至廢寢食然未嘗責償望報也子監生惟修字六恆能世其傳德昌七世祖尚恆明世宗朝官太醫院判以愈皇太子疾賜良士堂額並賜道在恆心傳世久志存培德活人多桂聯尚恆二子因以恆培二字世字其子孫云

○方廷對字仲德萊葭浜人少貧困訓蒙自給從名地師

遊得其指授又取古葬經等書潛研究閱二十年精其術相地決休咎輒奇驗嘉定王鳴盛深推許之

○陳志字贊皇父睿自上海徙居崑山志與兄忠字尙岐俱精醫求診靡至無不應手奏功志子元凱字士蘭少攻制舉兼習父業遊庠後醫名大著臨證察脈必凝神澄慮故治病多效年甫逾艾而卒

○唐和春字景柳居迎薰門外從太倉陸雲錦學寫生蟲魚花鳥栩栩豪素間識者謂能得元人祕奧性和易善談諧而口不言阿堵人多樂與之遊妻陸氏名琳卽雲錦女亦精繪事尤工牡丹女英別見才媛傳

○席存震字省伯先世居吳縣洞庭山父世鎮始著籍爲新陽庠生存震少與仲弟存泰同遊庠序並以才名著存震耽吟詠兼究心易卜取古揲著之法精研探索試之輒奇驗又嘗取劉徽注九章算法與古術參攷以器度其方圓徑幕得疏密離合之故由是通其術著有算學蠡測以 恩貢需次州倅道光初元邑中纂修志乘存震實預參校是歲卒存泰字安仲性狷潔工詩文由副貢授績溪教諭季弟存咸字受五諸生善行楷書尤工隸體間作山水亦秀逸有致

○湯場字孟陽孝子瑚兄新庠生世居真義少從徐傳詩遊詩筆超雋最工寫生所作翎毛草蟲點染生動意趣融愜性嗜飲而操行特堅非意之所屬夷然弗屑也

○錢培德字德培太學生世居安亭父郡庠廩生廷熊故精醫培德專其業兼內外證求治者應手輒愈性慷慨好義有貧病者輒資給之嘗著用藥準繩行世

○潘廷與字驥雲邑諸生住邑西南鄉舟直鎮精書法兼工鐵線篆文

○夏翬字羽谷太常卿景裔孫世居崑城工繪事尤善梅蘭竹石以墨法見長嘉慶年間畫名冠吳中晚年移居蘇郡同時陳本源號星泉居舟直鎮善繪純墨梅蘭兼工書法夏陳畫名並埒一時

○滕焯號醉墨家住尚明甸澱湖濱布衣博覽工山水人物後課徒廣福山中凡波濤之奔涌烟雲之變沒悉運

諸手腕中千態萬變淋漓揮灑每至得意時飲一大白案鋪大幅筆如風雨得神助沒後寸紙尺幅珍如吉光片羽

○孫坤原名之莖字慎夫號漱菴自號漱石生聰穎絕倫性好施不慕榮利素工畫寫生尤入神品嘗遊西湖歸繪湖景八林木寺院不爽毫釐嘉慶初客滬上名重於時有富紳某延至其家出卷軸索畫欲餽當路坤詰得其故曰我豈市執哉拂袖竟出其立品之高如此

○郎際昌字芝田邑諸生善畫山水宗董北苑巨然僧一

派  
○莊家增字葭渡舊澤村人弱冠補邑諸生精制藝尤工

細楷肆力於趙董嘉興張孝廉廷濟書名擅一時見家增書輒稱之因訂莫逆交兼工近體詩遺稿燬兵燹

○孫天騏字德甫號蘇門邑諸生形貌魁梧見者生憚性至孝幼喪母每見遺物必泣下交友坦懷始終如一力學博聞強識喜吟詠情詞浩瀚不事組織父夏重候選縣丞性慷慨廣交遊晚年家不給天騏乃習醫以濟生遂究心靈素日夜不倦金元四大家及近代名醫著作無不博覽臨證施治尤能切脈以悉臟腑就診者門常如市平生好施與計一歲所入濟貧振匱而自謀則不顧終身儉約歿之日身無以殮感恩之族相觀涕泣又好表揚忠孝貞節里有張貞女墓沒於荒烟蔓草尋其

迹立碣封其墓所著述庭訓揖翠山莊詩集醫林雜俎停雲館醫案咽喉問答銀板藏其甥嘉定金光祿樹基家兵後僅有存者

○傅繩祖字象賢太學生世居邑東鄉安亭鎮善繪事以墨蘭著名着紙有神韻又傅松字霞坡太學生精岐黃術尤精幼科

○張宸輝字朝翰新庠廩生工書法行楷又學岐黃術精天象言之多驗

○李廷銓字嘯筠邑諸生父祐邑廩生能文工書法廷銓自幼承庭訓臨池無間寒暑筆法宗歐柳二家爲同邑朱啟房入室弟子又徐應鐘字桐邨幼有穎慧應童子

試不售援例入胄監工隸篆亦精行楷臨右軍碑帖居多

○陶泉字吟霞住東鄉夏駕橋職監生素精醫理尤善畫墨松古秀奇突兼工山水花卉

○王榮棧字問樵號小蘭諸生性情澹泊日以詩酒自娛畫墨蘭最工又繪胡蝶工緻爲近時僅見

○龔成章字魯裁崑庠生性孝友母愛少子成玉成章卽推產與之師事王學浩作畫時學浩名噪甚求畫者盈門寸縑尺楮纔斷筆輒爲人携去嘗欲自圖其所居方伸紙適客至坐語良久追送客而入則墨瀋淋漓滿紙矣學浩熟視顧謂諸弟子曰吾憶初出時未下筆此何

來耶弟子皆匿笑已知成章作謂曰女筆墨乃至此乎卽題已名其上張之中堂學浩歿畫失去其家猶出重價贖歸焉成玉字有源天姿穎敏精時藝工詞章畫師成章每摹學浩作見者莫能辨積餼貢成均卒

○周纘字思承諸生好吟詩與同里丁潤族弟槐相唱和喜花木家故有廢圃雜植四時諸卉善醫生死每一見卜性傲携重金至者揮之門外或以父母兄弟故泣來之立赴酬以資則曰我爲若孝友豈賣藝哉卒不受間得金則與友若親之貧者共之有餘則置酒邀客賞花賦詩必盡而後止以故家日落卒年近六十子源字問渠亦諸生術少遜於父父歿時至不能給朝夕以是視

真新國縣續修台志 卷三十三  
疾必索酬然性誠直人以此多之卒年七十七同時有  
周廷相者字翼臣亦諸生與源皆以醫名于時崑令某  
及攝令張鴻先後表其庭一曰儒醫國手一曰妙手回  
春

○鄭孚成字邦萬祖思怙父淦世業醫至思怙父子名尤  
著孚成少習舉業屢困童子試遂援例爲監生傳祖父  
業切脈審病務周以詳投劑輒效富者不與較多寡貧  
者施以藥或反資以錢人故爭歸之所入旣優一意好  
行其德蓋自其祖父以來凡族戚之貧而待炊者與夫  
幼不能就傅喪不能殯葬及鰥寡孤獨之無依者咸歲  
時周卹至孚成視昔有加故家無餘貲道光十三年二

月卒聞孚成喪無不慟哭失聲子一應奎爲兄學成後

應壁廩生早世

邑人卹以  
燈有傳

○王所寶字賓之崑庠生工篆刻一切金玉牙磁瑪瑙碎  
礫水晶犀角等材較石刻爲難者一經所寶手古趣盎  
然絕非凡品方圓疏密悉皆自然合度有漢人質樸渾  
茂之遺著有杏耕樓印譜邑人吳映奎爲之序

○顧國樹字計堂崑庠生同邑王學浩門弟子工山水筆  
致蒼老秀逸設色處氣韻更生動咸豐末避粵匪亂居  
南鄉以憂悸卒

○方步瀛字潤干又字確困新邑庠生善鼓琴畫蘭竹隸  
書逼近漢魏中年不得志遜於釋氏長齋終身著有得



月樓吟稿弟步濠字古菴亦庠生善繪山水有詩稿

○徐寶稼字小耕崑山人少讀書應童子試家貧棄舉業習幕遊楚北父琬字席珍候選鹽場大使工篆刻兼善書畫宗法元人趙孟頫書法秀逸畫人物花鳥蟲魚點綴生動異常頗自矜貴不輕作兵燹後家僅存菊花譜一卷各種俱備寶稼亦善繪事蚨虻尤工着紙欲飛遊楚時人爭乞之楚人呼爲徐胡虻年僅三十一卒於楚

○張圻字樹封新庠生早年棄舉業習醫精東垣之書病雖難治凝思切脈付以方曰服此若干劑愈矣不必再踵門也後果然性灑落儉約見後進謹飭士及納袴子弟必舉以訓其子曰若者可與遊若者當以爲戒言貌

質樸有古人風

○徐寶章字書農邑諸生世居菜南五圖家貧事親能得歡心處昆弟以友愛聞少抱不羈才工詩古文辭精六法善撫琴又精軒岐術婦科傷寒諸證尤所擅長旁通秦漢篆刻及堪輿星命等書焦山詩畫僧雪舫來遊與之善雪舫沒經理其喪葬復立碣誌其墓其好義類如此素性落拓爲人治病不計酬生平著作隨手散佚晚年遭回祿益貧困賁志以卒

○趙安止更名文彬字菊松嘉慶癸酉科舉人世居真義鎮幼穎慧卽工書年舞勺能作臂窠大字筆力秀勁其品學兼優爲鄉里所推年六十餘卒弟安禮字梅溪性

寬厚好施與亦工書兼精隸篆安止長子之駿字月卿  
邑諸生天姿學力卓越尋常書法學褚河南臨摹酷肖  
○陳燾號曉亭真義鎮人善繪事以工細擅長子福基字  
松軒承家學精於丹青尤工畫松鼠壽至七十餘歲又  
金成穀字稔甫新邑諸生亦住真義鎮善畫山水清秀  
絕倫兼精書法子浴沂諸生績學早卒亦能書

○王昭字雯若國學生居邑西鄉張浦鎮工書善畫山水  
宗黃子久得其神髓尤精岐黃術爲人治病輒應手而  
愈生平澹於榮利家居課徒餘藉翰墨自娛雖寸幅尺  
縑人爭寶之

○閔籍字鑑亭住西鄉之白塔港業傷科就醫者應手輒  
愈嘗言自幼收埋暴露人身骨節部位熟詳許明故能  
醫治有效如此年至七十四卒又陳椿年字徵庭住西  
鄉落霞浜國學生精醫理遇傷寒重症切脈施藥尤能  
應手里人稱之

○戴傳震溶子原名葆鈞號省齋歲貢生性誠樸寡言笑  
課徒以立品爲先晚業醫精婦科求治不計酬雖遠必  
徒步往診見時醫用藥喜寫別名易於悞人著本草分  
韻便覽五卷卒年六十五子之翰庠生亦善醫

○趙愔字恂甫父士鰲字芳洲世居張浦戚家橋少孤苦  
志讀書補諸生家塾授徒嗜唐宋碑帖及古硯家貧苦  
必措資得能以能書名愔幼承庭訓亦善書左右手兼

能細楷深得歐柳筆意爲文有雄直氣歲科試輒列優等餼於庠秋闈試屢薦不售遷居花園邨杜門課讀喜吟詠脫稿卽散佚年近五十值粵逆擾鄉絀生計時斷爨火雖親友不屑作乞米書憂憤絕食死

○席元禧字潔人祖世寬自吳縣洞庭山來崑業懋遷致富遂買宅遷居焉父存瀾候選布理問無子嗣姪元禧爲後元禧早年失怙拊搗家政卽棄帖括學援例入成均以布經歷謁選工漢隸大小篆兼精鍊筆性閒雅宅後拓場圃數弓壘石鑿池蒔四時花木營精舍十餘楹名曰隱園廣交遊賓客過從座無虛日年四十餘卒

○王震甲字葭止自幼讀書邗江歷從名師遊穎慧邁人學有根柢弱冠補諸生卓犖有大志素工書法宗顏魯公柳公權筆意善擘窠大字秀勁奇突光緒四年應科試優等當餼於庠病篤未及食餼卒年三十士林咸悼惜之

○徐經畬字心耕國學生世居磧磽邨祖振邑庠生父邦瑞精堪輿中年善病經畬侍側長夜不解衣帶幼讀書聰慧長承家學亦精地理壯歲出遊所過名山大川繪圖記之通天文象數之學著有星學各書數種撰橘囊圖星儀要圖兼中西兩法言之兩圖並製尺式年四十五卒

崑新兩縣續修台志卷三十三終

崑新兩縣續修台志卷三十四

遊寓

晉

王珉字季炎少有才藝善行書與兄珣齊名歷著作散騎郎黃門侍郎侍中代王獻之為長兼中書令世稱獻之為大令珉為小令珣為吳國內史珉買宅居崑山後珣舍虎邱別業為寺珉亦舍崑山宅為寶馬寺太元十三年卒追贈太常

孟嘉字萬年江夏鄂人仕至征西大將軍長史江州別駕成帝時除尚書刪定郎不拜遊隱於婁縣創宅馬鞍山南居焉子孫世守其業十三世孫簡字幾道仕唐由給

事中觀察浙東進尚書與崑山縣尉孟庭份為從兄弟  
嘗受學庭份遂移治其宅即今之縣治也

互見公署

唐

陶峴晉徵士淵明之裔開元中家崑山富有田業擇家人  
不欺而了事者悉付之身則徧遊江湖往往數歲不歸  
見其子孫成人不辨名字峴學爛經濟而疎脫不謀宦  
達生通八音換樂錄八章以定其得失自製三舟備極  
堅巧一自載一載賓客一置飲饌客有進士孟彥深孟  
雲卿布衣焦遂各置僕妾其載峴有女樂一部奏清商  
曲逢佳山水必窮其勝名聞朝廷經過都邑靡不招延  
峴拒之曰某麋鹿間人非王公上客亦有不招而詣者

吳越之士號為水仙嘗遊南海得古劍玉環崑崙奴奴  
善沒及回櫂入湘江水色可愛則遺環劍令奴下取以  
為戲笑焦遂引然犀事諫止之不從至西塞山下奴為  
毒龍所傷失其環劍峴流涕乃命回櫂因賦詩自此歸  
老於吳

陸龜蒙字魯望吳人漢陸賈裔唐天后朝宰相元方七世  
孫父賓虞以文名歷侍御史龜蒙憲宗時人少高放通  
六經尤善春秋明經應制不第往從湖州刺史張搏遊  
搏歷蘇湖二州辟為佐嘗至饒州三日無所詣刺史蔡  
京率官屬就見龜蒙拂衣去隱跡松江甫里多所論撰  
雖幽憂疾痛不少輟文成篋橐篋中或歷年不省為好

事者盜去得書熟誦乃錄嗜茶置園顧渚山下歲收茶  
租自判品第生平不與流俗交嘗升舟設篷席齎束書  
茶竈筆牀釣具往來時謂江湖散人又號天隨子甫里  
先生長慶中以高士徵不至李蔚盧携素與善及當國  
召拜左拾遺詔下龜蒙卒葬白蓮寺旁光化中韋莊表  
龜蒙及李賀孟郊賈島温庭筠等凡十人皆有奇才追  
賜進士贈右補闕有吳興實錄松陵集笠澤叢書等行  
世子三德孚德觀德謙舊志本列龜蒙遊寓自方鵬志  
辨其在長洲與崑山無涉遂剛  
去然龜蒙以前里先生稱按甫里界  
長崑兩邑餘韵流風似宜採入遊寓

宋

王綯字唐公秦正懿王審琦五世孫宣和七年廷試爲詳

定官多取議論剴切者寘甲科建炎初爲御史中丞金  
人入寇綯具陳攻守之策宰相不能用扈從車駕南渡  
東宮建綯以資政殿學士權太子少傅三年拜參知政  
事自建康扈駕至臨安道次鎮江從容奏曰陳東以忠  
諫被誅此其鄉里也上卽命賜其家官其子四年上幸  
越州韓世忠邀擊金人歸騎於揚子江綯議遣兵追襲  
與世忠夾擊之同政者議不合遂求罷出知越州御書  
霖雨思賢佐丹青憶老臣十字賜之綯爲人剛正自守  
立朝無所阿附雖爲執政其家貧甚每以祿不及親自  
奉儉薄仕宦二十年無寸椽可居奉祠後寓崑山薦巖  
僧舍蕭然一室服食器用無異寒士天性仁孝調卹姻

族無所不至平居無他嗜好惟以讀書爲樂其文溫潤  
典雅深於理致紹興七年卒年六十四諡文恭寢疾時  
家人召醫且欲灼艾絢曰時至卽行留連無益前期二  
日書戊戌字示左右已而果然子陔諸志敘次多訛据  
宋史本紀改正  
衛闐字致虛先世齊人唐末避亂徙華亭至闐始家崑山  
之石浦登政和八年進士官國子監博士宋制國子諸  
生得上書言事爭朝廷得失闐益鼓勵其氣以忠孝大  
節勉諸生學者宗之歸里後寄懷詩酒以終後以孫涇  
貴贈如其官

唐輝字子明郡人寓居崑山以文章名於時登政和乙未  
進士紹興中爲諫官時虛知原知臨安府爲政乖謬輝

論罷之官至禮部侍郎弟煜字子光建炎戊申進士官  
朝請大夫輝子子壽字致遠隆興癸未進士官朝議大  
夫其後多居郡中居於崑者曰叔達官至通直郎賜緋  
張滙字朝宗其先濮州人洛陽者英會龍圖直學士張燾  
其祖也滙當南渡初五爲浙漕時宰臣開督府分道遣  
兵詔滙隨軍應副不限以路滙歷江淮歸浙建臺玉峯  
因家焉嘗卿棘寺以刑清特詔褒美官至中大夫直寶  
文閣由是子孫遂爲崑人

龔猗汴人爲殿中侍御史扈從高宗南渡道經崑山真義  
折銀杏一株插地祝曰若此枝得活吾當居此其枝果  
長後成大樹繁枝膠屈如瘦如乳者七十餘顆時人異

之稱爲龔遇仙樹子孫遂爲崑人

樂備字順之一字功成由淮海徙家崑山登紹興甲戌進士有學行能文章尤長於詩與范成大馬先覺共結詩社官至軍器監簿

李衡字彥平江都人高祖昭素仕至侍御史衡幼善博誦爲文操筆立就登進士第授吳江簿有部使者怙勢作威侵刻下民衡不忍以敲扑迎合投劾於府拂衣而歸後知溧陽縣專以誠意化民民莫不敬夏秋二稅以期日榜縣門鄉無吏跡而輸送先他邑辦在官四年獄戶未嘗繫一重囚隆興二年金犯淮堧人相驚曰寇深矣官沿江者多送其孥於內地衡獨自浙右移家入縣民

心大安盜蝟起旁境而溧陽靖宴自如帥汪澈轉運使韓元吉等列上治狀詔進一秩尋召入爲監察御史歷司封郎中樞密院檢詳出知溫婺台三州惟婺嘗涖其治加直秘閣而衡引年乞身懇懇不休上累卻其奏除秘閣修撰致仕上思其樸忠旋召落致仕除侍御史以老固辭不獲差同知貢舉會外戚張說以節度使掌兵柄衡力疏其事謂不當以母后肺腑爲人擇官廷爭移時改除起居郎衡曰與其進而負於君孰若退而合於道章五上請老愈力上知不可奪仍以秘撰致仕時給事中莫濟不書敕翰林周必大不草制右正言王希呂亦與衡相繼論奏同時去國士爲四賢詩以紀之衡後



定居崑山結茅別墅杖履徜徉左右惟二蒼頭聚書踰  
萬卷號曰樂菴卒年七十九衡自宣和間入辟雍同舍  
有趙孝孫者洛人也其父實師程頤家學有源勸衡讀  
論語曰學非記誦詞章之謂所以學聖賢也不可有絲  
豪偽實處方可以言學衡心佩其訓雖博通羣書而以  
論語爲根本臨歿沐浴冠櫛愴然而逝周必大間之謂  
臨終如此殆孔門所謂聞道者與宋史子應祥起宗孫潛  
俱登第裔孫昱嘗輸粟賑饑有司旌以冠帶辭不受  
劉過字改之吉州廬陵人自號龍洲道人尚氣節喜飲酒  
爲詞章豪放英特高視一世陳亮陸游辛棄疾皆折節  
與交周必大爲相欲客之門下不就嘗試有司累不第

以書干當道陳恢復方畧不省光宗遘疾久不過重華  
人情洵洵過伏闕上書極言溫清之禮有缺詞意剴切  
尤爲中外所推許時故人潘友文宰崑山過客其所遂  
娶婦而家焉旣卒無子貧不能葬友文與主簿趙希楙  
買地馬鞍山東葬之并立祠東齋之側陳振志其墓曰  
大中又哀名人諸題咏曰楚些遺音行於世過所著有  
龍洲集其墓屢廢屢復崑山人集其事爲懷賢錄  
敖陶孫字器之長樂人贅居崑山少儻有大志爲文援  
筆立就弱冠魁鄉試入太學以詩名於時韓侂胄遂丞  
相趙汝愚道从衡州陶孫哀之題詩三元樓其末句云  
九原若遇韓忠獻休說渠家末世孫幾爲捕者所得侂

胄死登慶元己未進士官奉議郎僉判泉州  
易斗元一名斗南字復之號蓮峯廬陵人登咸淳進士第  
素有風格爲常熟尉攝警崑山國變因家焉子偉字成  
大號兼山幼失怙恃負氣積學能自卓立既強仕困於  
無貲卽試吏平江再調嘉興三擢浙省幕官後以從仕  
郎吉水州判官致仕居間以禮法繩子孫工詩歌人稱  
兼山先生卒年八十八曾孫恒

高晞遠字照菴通州人咸淳德祐間通判平江府城潰家  
亡熒然一身浮游江湖嘗館於石浦衛氏以所學私淑  
諸人晞遠資稟秀朗學問該博尤精邵雍之學謂邵子  
觀物以色氣味聲色氣味有一萬七千二十四人之目

鼻口不能盡其觀嗅嘗惟一萬七千二十四聲可以字  
別舉聲之一例而色氣味可類推也由是而精通音律  
嘗手截竹爲管以定五音六律進反之間疏數之節細  
微之辨豪髮弗差晚更嗜參同契研究甚力嘗謂其書  
大抵以納甲之說寓其行持進退之度然納甲法卽先  
天圖也第未知伯陽用虞翻之圖抑虞翻反用伯陽之  
圖耳他凡陰陽術數太乙六壬咸究其妙又因動聞聲  
可以驗吉凶定禍福其後學皆無傳者

元

俞君登字泰卿福州長樂人早孤母黃親授以書宋亡隱  
居婁東自號知止翁累徵不起延祐中卒門人私諡貞

節先生子焯字元明泰定丁卯進士官仙居丞

顧信字善夫由崇明徙居崑山大德初爲浙江軍器提舉  
讀書嗜學敦尚儒雅以能書稱從吳興趙孟頫遊得其  
書必鐫於石構亭曰墨妙晚號樂善處士

俞銓字士平江西豐城人明敏該博工詩文至正間爲江  
浙儒學提舉徙居崑山

楊諱字履祥浦城人徙居於婁爲崑山州學訓導與秦約  
袁華爲友博學有才行不慕聲華專工著述自號東溪  
老人作崑山州志楊維禎爲之序

盛德瑞字祥夫江陰人少孤鞠於祖母始冠徙崑山以周  
易教授閭里至正中聘爲州訓導歷事七年教績甚著

鄭東字季明平陽人寓於崑山天分絕人再踐場屋不遇  
遂棄去遊浙江肆力於古文久之思如泉湧文益奇峭  
歐陽元奇其才欲薦之會病卒弟采字季亮性狷介因  
東客崑山來就學未幾下筆爲文皆有矩度然剛毅忤  
物竟以坎壈終金華宋濂嘗序其聯璧集評東之文氣  
韻沈雄采之文規製峻整君子以爲知言東子思先字  
歐仲明洪武中以儒士授國子助教遷監察御史再遷  
福建布政使上疏請罷采木進磨勘司令

陸仁字良貴河南人寓崑山爲水軍都萬戶幕僚明經好  
古其詩清雋奇偉如佛郎國進天馬頌水仙廟迎送神  
詞渡黃河望神京諸篇士大夫莫不稱道歐楷章草皆

灑然可觀

盛彧字季文常熟人生於富室篤志力學工詩文值元季兵亂贅壻崑山周庸叔與楊維禎鄭東秦約文質陸仁輩遊後坐累謫戍舟泊金山遭疾朗吟一律投筆而逝李簡字士廉廬陵人僑居崑山操守端方文學優贍工於詩尤通陰陽家學同邑有張士行號雲門元末寓崑山與倪瓚相友善

夏迪字君啟吉安人元季方寇之亂以海道萬戶爲行軍經歷統衆至崑值明革命以山水之佳贅而居焉結廬讀書詩酒自適號樂道先生卒年八十餘

明

王彝字常宗其先蜀人父內泰官崑山州教授留居於崑彝自號媯雌子少貧記書天台山師事孟長文長文爲金履祥弟子故彝之學遠有源委爲文精嚴縝密明暢英發不爲腴詞以逐時好楊維禎以文章雄視東南彝著論曰爲文妖洪武初與修元史賜金幣遣還徙居嘉定又薦入翰林以母老辭歸後與高啟坐魏觀事死吳獻字孟思號雲濤其先閩封人從宋南遷居於杭自幼好學工翰墨尤嗜古篆籀通六書奧義爲人外通內介性耽山水絕意進取游寓崑山以疾卒於馬鞍山頂塔院歸葬武康易恆賦詩挽之有云漆書已負成蝌蚪石鼓空傳出寶雞子昭

盧昭字伯融閩人寓居婁東父鈞華善教子昭從明師學經史百家靡不探究長於詩所作皆有法度洪武初以薦為揚州教授

趙允中字克和開封人元至正間任平江路市舶提舉因家崑山明洪武七年以薦任刑部員外郎遷大理寺評事子英官廣州府知事

沈誠字敬言家世長洲至誠始占籍淞南之吳家橋時同邑王明善隱居教授倡明正道誠移家就學悉得其蘊為門下高弟永樂中以薦授松溪主簿能以善化民佐治期年頌聲載道以老告歸性善飲在松溪日盃葷不離於手令懼其以酒廢事屢覘其政政無不舉歸里後

日與知交引觴劇飲竟以酒疾卒鄭文康銘其墓

章宗實字若虛常熟人大理少卿格孫父注官衛千戶為安定楊氏贅壻因占籍焉宗實領嘉靖庚子鄉薦授廣東歸化知縣縣在萬山中民椎而獷前令設重閉為衛謝不見容宗實至民得以情請嘗捐俸葺學宮新講堂與諸生談說經義廣盜發攻城城舊無濠宗實倡吏士堅守為螿蟄起敵樓四周浚濠復出貲賑軍士城得完辛酉春盜復大起相拒七閱月始退以勞得疾卒

張名由字公路嘉定人居安亭江上年三十即棄諸生業博考前代掌故於兵農禮樂星占分野輿圖阨塞皆如指掌素工詩歷遊燕趙韓魏間弔古興懷詩筆益雄健

胡宗憲總制兩浙嘗屬鄞縣沈明臣喻意招致謝不往  
所居江口故有第六泉因以六泉自號卒年九十一

張義字素菴自言汴人或云北直人性倜儻有奇畧好談  
關塞事崇禎中來居馬鞍山左拱辰門下環堵蕭然而  
見義必爲出貲設義塾於景德寺中延陶炎爲師貧家  
子弟咸就學焉凡修脯之儀及生徒養殮無不周至久  
之以兵亂塾廢義旋卒葬北門外黃滄涇

童揚字仲明本佟氏遼陽人父卜年官登萊監軍僉事以  
熊廷弼案牽連罹法揚變姓名來崑山依卜年門下士  
顧錫疇以居能詩文痛父被難日抑鬱不自聊積二十  
年而卒錫疇刻其詩百餘篇行世葉國華序之

張采字受先太倉人崇禎戊辰進士爲臨川令移疾歸南  
都起授禮部主事進員外尋乞歸采嘗與同里張溥舉  
復社稱弟子者數千人爲忌者所傾久之得白晚究心  
理學以程朱爲宗其居鄉也以急民困鋤強暴爲事甲  
申乙酉間怨家乘亂擠擊幾死後遂竄伏不常先後寄  
居崑山之湖濱及范氏莊尋卒

史孝威字子虛餘姚人萬曆甲戌進士江西僉事元熙子  
諸生時尙書孫鑛罷官里居以古文詞倡導後進孝威  
得其指授討論窮日夜屢紬秋闈遂絕意進取山陰劉  
宗周以忤璫廢斥講學於鄉孝威與之往復研究務講  
明絕學從遊者數百人福王立以真儒薦魯王監國命

長興縣志卷三十四  
所在安車蒲輪徵之並力辭不赴乙酉春邑人葛芝迎之至崑一時問道之車盈戶外又三年卒年七十八  
馬良字子善臨安人來學於吳因家焉自幼巧慧精繪事晚移崑山嘗作四天王像於僧寺甚奇特盧公武熊爲作傳

國朝

○李清字心水揚州興化人大學士春芳曾孫明崇禎辛未登進士授寧波府推官擢刑科給事中同日上兩疏一言禦外敵當戰守兼治不當輕言款禦內敵當勦撫並用不當專言撫一言治獄不宜置失入而獨罪失出又以刑部案牘積滯論尙書劉之鳳首鼠狀天大旱疏

○劾尙書甄淑引烹宏羊誅來俊臣爲徵淑怒劾清把持謫浙江布政司照磨淑敗起補吏科疏陳刑賦病民請輕徭解網不報尋遣冊封新昌王未返命而京師陷福王卽位遷工科都給事中見朝政日壞累疏極言之報聞而已又以愍帝廟號思宗同於漢後主禪請易之又請補諡太子二王章奏後先數十上率抵觸忌諱遷大理寺左丞遣祠南鎮行甫及杭而明亡避地居崑山十有餘年以著書自娛都御史蔡士英以遺逸薦學士徐元文以修明史薦俱力辭不赴清於書無所不窺所著史論絕不蹈襲成說子三貞蘭栴栴自有傳

○陳瑚字言夏太倉人父朝典字徵五端方靜正著書教

授學者謂有溫公家法稱溫如先生瑚讀書不屑章句精研性理以修齊之責自任旁及律歷兵農明崇禎壬午領鄉薦江南大飢上當事救荒四政支吾三策搃腕時政著私議十條續議五條皆切要明亡奉父隱居崑山之蔚村力耕以養村田沮洳導鄉人築隄捍水歲收獲稔以孝弟力田爲善三章與眾約眾皆悅從倣白鹿洞規與諸士儼輩講小學大學易學定日記考德業歸本於遷善改過致知力行吳婁之間從遊者常數十百人爲文原本經訓不懈而及於古卒年六十三門人私謚安道先生巡撫湯斌卽其故居建安道書院祀之

○張應宿字月鹿鄞縣籍明尚書邦奇之後負氣謹不苟

然諾順治初遊江淮南北偶來崑山寓景德寺與文人耆德交自名湖東釣隱湖東者賀知章所乞鑑湖一曲處應宿之所居也四方之士多贈以詩文獨與葛芝爲知己後以病卒朱用純葉奕苞呂廷章輩歛賻金葬之

馬鞍山陽題曰浙東義士無待張先生之墓

○朱寅字遂之無錫儀莊人本姓徐幼繼於朱遂蒙其姓少師事江陰尹嘉賓旋居崑山博覽陰陽醫卜百家之書善書能擊劍諸生胡甲桂再喪偶寅愛其才妻以女甲桂官江右寅往佐理福王時甲桂任廣信同知將殉死以妻及三歲子溶時屬寅寅攜入深山屢經危險至身墜崖下藉草得活間關回吳幾死者數溶時旣長授



之書稍懈涕泣施夏楚曰吾不忍負曩約也卒年七十  
○顧景星字赤方一字黃公湖廣蘄州人而穎異六歲  
能賦詩長而究心經世之畧明季流寇陷蘄游寓崑山  
後往來吳楚間當事交章薦辟皆不就康熙戊午徵舉  
博學鴻詞以病乞還顏其堂曰白茅有集行世

○吳義齋者歙人服賈來崑有儒行好濟物不求人知世  
亦罕知之者所爲詩及小令聊以寄意而音節圓美脩  
然塵外所著經畚堂詩嘉定黃涓耀嘗序之

○孫勝鼎字玉鉉本歙人有膂力任俠負氣明天啟中挾  
重賞游楚中設二解庫於穀城崇禎十年張獻忠羅汝  
才就能文燦撫分屯穀城房縣勝鼎知二賊必復肆殺

掠乃散所有以活饑民明年二賊果叛勝鼎被獲夜遁  
再被獲賊碎其兩耳爲識乘間復遁有表戚周某宦襄  
府往依焉周引見王力陳襄陽爲全楚要地賊窺伺已  
久今封疆之臣非不戒嚴而練兵儲糧未聞善策將來  
進不可戰退不可守王能安枕乎王笑謝欲薦之堅辭  
而退越五日而禍及勝鼎竄歸則游經荒亂產已落  
國朝順治二年挈家居崑性嗜飲一石不醉遇貧無告  
者輒傾囊相畀康熙庚午春沐浴端坐而逝

○潘平格字用微慈谿人順治中婁東陳瑚招同講學寓  
居崑之薦嚴寺其學以渾然天地萬物同體爲宗歲大  
旱強之登壇禱雨平格口誦孝經伏赤日中忽陰雲四

皇朝詞林續修合志 卷三十四  
合大雨立沛薄暮縣令請相見櫂舟避去後卒於浙  
○吳及又名喬字修齡太倉人來贅崑山明崇禎十一年  
補諸生尋被斥遂事佛兼好神仙遊京師與鄢陵梁曰  
緝友善劇談世外徹夜不倦聞江淮有異人裹糧往從  
之及於書無所不窺自天文樂律地理兵法下至醫藥  
卜筮壬奇禽乙刺槍拳棍靡不探原竟委其詩初學明  
人中宗溫李晚年所見益邃自悔少作譏斥宏嘉以來  
有辭無意者謂唐詩最盛以其有興比賦耳宋人鮮興  
比而多賦然而言猶達意宏嘉之復古惟尚聲色并賦  
義亦亡之其所服膺者常熟馮班金壇賀裳二人合採  
其說成圍爐詩話六卷又取李商隱無題諸詩詳說其

意爲西崑發微其議論皆前人所未有也又善古文辭  
嘗作史論二十篇見者服其識力又据吳偉業綏寇紀  
畧爲撫膺錄四卷其畧言明所以亡有四十三失而皆  
齟齬果之所致時以爲篤論康熙乙亥卒年八十五  
○鍾曉字人雅或曰涪崖不知何許人明崇禎末流寓崑  
山面短而秀聲若洪鐘無妻子不設爨具飢就人食兼  
索酒時時大醉而行吟不輟嘗闖入縣治忤令令笞之  
每下杖輒呼快人問之答曰呼快與呼痛同一出聲耳  
見高墻堊粉輒以所作題擘窠書夏日沈飲溺水死葉  
方藹獨賞集稱其詩別具深情妙緒當其絕至哀樂紛  
來能使人當歌忽泣破涕爲笑所謂尤物善移人情云

○陸志熙字子敬吳縣人吏部郎中康熙子明末由諸生  
選貢尙氣節工詩文承先志不謁選人康熙初遷崑山  
南星濱與歸莊王晨吳及輩結社賦詩少與徐乾學兄  
弟友善後乾學屢書招往都門不答以博學鴻詞薦亦  
不應未幾卒子從吉少補諸生工文敦行以歲貢終  
○周同谷字翰西常熟人年十三補諸生福王時謁史可  
法於揚州論列時事可法稱其諳練後寓崑山知止山  
房詩文蒼古盛爲名流推挹旣歿貧無以殮長洲郭庶  
經紀其喪葬之馬鞍山東麓庶字三餘亦明季諸生工  
詩文國變後賃居崑山景德寺與同谷晨夕倡和爲莫  
逆交晚歲歸耕新郭以老

○李柟初名葉字倚江清季子少贅崑山葉氏康熙癸丑  
成進士選庶吉士授檢討累官左都御史當己卯春

聖祖南巡閱河時柟以司空居母憂迎駕宿遷會清

口久淤延議欲改移五家墩洩水

上以問柟柟言遠移清口不若厚築高堰逼淮以衝清口  
之淤且可刷黃歸海從之高堰之六壩始不爲下河  
害又疏黃淮合流固順水性水道而馬邏童家營諸處  
旁潰而南足爲漕運田廬患乞 敕河臣速濬雲梯關  
海口使淮黃有歸宿因上治河議千餘言

上嘉納之時以科場積弊議令監生各回本籍應試柟謂  
如此則國學一空千百年大典遂廢力爭而止各省報

災率以六七月及蠲免令下徵輸已過半官吏得以侵牟貧民未能普霑實惠柟請嗣後遇水旱本年所徵停至來冬奏銷轉預蠲其次年額賦則弊除而澤普又時以賑東省飢輸挽不時至柟奏由海道發運及期而至六郡得安尋以疾告歸卒于炳石丁卯舉人內閣中書炳細字厚文附例貢生炳細子肇域字拱辰雍正己酉舉人父子俱以好學工詩著肇域子諤字越干始著籍新陽餼於庠績學能文諤子純禮字儀萬以長厚稱

○汪之萼字含章自歛遷杭州性至孝嘗割股療母疾以陂業寓崑聞父病劇倉卒歸誤入盜艘號泣不已盜感動僅攫囊篋去篋內一硯爲父所珍宛轉以告盜舍之

比歸父歿葬之南屏山麓廬墓終身子于翰能文音官內閣中書與弟翼雲于高于蕃同居共爨內外四百餘人家法肅然于高字昭式平日嗜酒兄嘗戒之兄卒遂絕飲善擘窠大字于高子守湜由歲貢授龍泉教諭

○汪廷揚字以言守湜季子承陂業挈家居崑性儉約好施子戚友負官帑不能償者輒代償之或轉資之得筮仕有曹姓者曾與廷揚訟其人歿後有三世棺俱暴露廷揚代爲營葬邑中重修志乘首先捐貲以助其役長子獻瓚字在中慷慨好義如其父少精醫理嘗製藥濟人終身不倦乾隆乙卯 召與千叟宴 賜拄杖錦緞歸卒於子本莊山東官署弟獻芝字鳳梧庚辰進士湖

廣道監察御史終刑部員外本莊字敬敷幼穎敏年十  
九雋副車丁酉登賢書授山東陵縣知縣調冠縣善治  
獄手判口斷不假手幕僚所至能舉其職間作詩歌淵  
雅得先正之遺父艱服闋知府谷卒於官

○姚浩字謹行先世自無錫遷吳門隸長洲籍浩贅於張  
浦朱氏遂卜居焉康熙中由太學薦舉充武英殿纂  
修選授澧州判官地雜苗夷多蠱術殺人浩宣布恩威  
俗以丕變尋乞歸夙工詩善畫尤精楷隸得黃庭九宮  
遺法間架嚴整腕力厚勁人爭寶貴之年七十餘卒

○金祖靜字會川吳縣人雍正戊申以恩貢舉賢良授七  
品京官歷戶部員外郎乾隆中隨經畧傅恒勦金川寇

凡帷幄機務調餉奏銷祖靜佐理之功居多金川平

恩加知府銜仍留部尋擢知濟南府累官至貴州布政  
祖靜操履廉潔居官所至有聲素工書嘗奉

命書

安南國界四大字字徑丈有六尺筆勢雄渾見者驚服  
晚卜宅於邑之西關內治圃栽花木顏之曰雲區有排  
青亭聚沙池如許清齋諸勝祖靜與二三故舊徜徉嘯  
歌其間一時名流題詠甚多有乞書者忻然應之無倦  
色卒年八十一嘉慶初楚督題請入祀武昌名宦祠

○戴汝槐字植三世籍休寧後遷山東掖縣國初徙揚  
州祖夢麟官奉天府尹父思訥官編修以死孝旌汝  
槐年十三補江都諸生旋奉母陳及弟汝棻椿汝栻僑

寓蘇城雍正間買宅崑山既復與弟俱改就掖縣原籍  
應試領乾隆丙辰山東鄉薦第一授滋陽教諭遷廣西  
武宣知縣終河南汝寧知府汝槐居官勤慎能耐煩劇  
性廉潔無聲色玩好之習在汝寧協捕逆匪王倫餘黨  
以勞卒官汝棻字襲芳雍正庚戌進士戶部主事椿字  
大年以保舉授知嵯縣累擢四川忠州知州州產五穀  
多細小椿以江浙糞田之法製短歌曉諭之有倣行者  
輒倍收大府下其法於他郡邑為利甚溥移疾歸崑山  
卒汝槐子元熹好學有文官長蘆鹽大使椿子超曾河  
南試用縣丞元燾山東滋陽縣丞汝棻子元夔字鳴球  
以進士官定邊知縣元章字端甫四庫館議敘權知鳳

陽縣元熹子書培書培子葆瑩並居元邑以科第顯書  
培弟書源字復軒嘉慶辛酉舉人廉介有守而宅心誠  
樸掌教青溪書院以敦本力學訓士人多樂就之買宅  
城南終老焉

○李瑞岡字義一武進人乾隆庚辰進士選庶吉士改工  
部主事銓補直隸州牧父憂歸辛丑來主玉山書院講  
席學行醇粹接之者如坐春風課諸生講說不倦務期  
為根柢之學士皆悅服後有趙遵律號蘆洲河南鄆城  
人乾隆乙未進士性灑落喜引掖後進為文一宗先正  
詩尤卓犖不羣後歷官遵義知府按玉山書院創自乾  
隆已卯主講數十人  
可紀者不少其本係邑人業散見  
各傳外擇其尤卓著者列之游寓

○褚廷璋字左峩長洲人乾隆甲戌以拔萃選太和教諭  
丁丑 召試 賜舉人授中書癸未成進士歷官至侍  
讀學士以疾歸僦居崑山以老廷璋屢司文枋稱得士  
寓崑時杜門著述經籍疑義多所發明時故人青浦許  
寶善方主講玉山每相見惟舉古今疑義相質證寶善  
字穆堂庚辰進士官浙江道御史病廢歸爲邑山長纂  
輯五經揭要梓行以示學者詩宗少陵書法華亭尤善  
填詞晚卜居通德坊卒年七十一

○李保泰字齋生寶山人少孤居貧力學乾隆庚子進士  
官揚州府教授課諸生不事揣摩逢世術間梓爾雅夏  
小正等書以勵來學夙工詩古文詞與桐城姚鼐最相

契郵筒往復輒以所撰著相印證遷國子博士引年告  
歸樂崑山風土卜居邑之東塘卒年七十有二著有齋  
生居詩文集三十卷江都甘泉續志江灣志稿若干卷  
○陳樹德字裕本嘉定國子生居安亭東泗涇博學好古  
嘗輯鄉先賢黃涇耀年譜復捐田於墓資祭掃後移居  
崑之西泗涇葺復明詩人張名由墓立碑以記又輯安  
亭志於兩邑節孝藝文多所闡發云

○黃理齋失其名嘉定人涇耀裔孫乾隆嘉慶間來崑山  
寓北鄉潘氏最久能詩文善堪輿奇門六壬諸術嘗遊  
楚中偃白蓮教匪滋事理齋客竹谿署中賊圍城急竹  
谿城小勢不支理齋以計擒賊謀且縱反間賊解圍去

時賊勢張甚蹂躪數省獨竹谿獲全當事欲挽之且謀得官理齋不應去蒲圻張自蒞者海內名士足跡半天下理齋往訪則已沒因爲之卜葬於眠犬山與其長子耘溪及府學博孫月泉經紀其事

○洪其紳號定山貴州玉屏縣人先世爲宋徽猷閣直學士諡忠宣皓居鄱陽裔孫壽明初征苗開通黔道遂家首屏祖湜康熙丁酉舉人廣東澄海知縣父渠優行庠生其紳乾隆庚寅科本省解元戊戌成進士授翰林院檢討改刑部主事洊升禮部郎中外擢浙江台州知府在任七年海盜滋事督率官兵防禦隘口沿海居民賴以安堵台地每患旱虔心祈禱甘霖輒應民咸德之調

署杭州府以病去官就醫來崑買屋東塘居焉先嘗主講湖北荊州鹿門書院教士有法多所造就至崑邑人請主玉山書院其造就人材一如在荊州時長沙陶文毅樹爲其紳門下士巡撫江蘇按部至謁見詢民疾苦其紳與談政事絕無干請平居戲門好讀易精通六壬神卦著有易通六卷卒年七十餘葬吳縣之西鄉從孫聿豐字芑洲祖其麟庠生浙江歸安埭溪司巡檢父如羲廩貢生順天宛平管河丞署保定知縣聿豐生而穎敏沈靜寡言笑八歲隨父宦京師稍長入成均道光甲午領順天鄉薦試禮部不遇家素貧橐筆游幕歷奉天江西江南當路爭延致之謁選得江西縣令補高安高



安當兵燹後瘡痍未復聿豐嚴保甲偵盜賊訓農課士  
愛民如子口碑載道呼爲佛子時軍書劬午兵餉孔艱  
民恐累官竭力輸將未市月而漕務告竣以治行最擢  
廣信府同知未及行粵匪餘孽竄縣境城中兵不滿百  
聿豐繕守戰具外挫寇鋒內詰奸細請援大營鮑軍門  
超帥師馳至圍解而城得全心力交瘁得中風症力疾  
抵同知任踰年乞休來崑卽其紳故宅建屋以居閱四  
年卒年七十四聿豐內行醕備孝友兼至爲善如不及  
爲文章有師法尤工六朝體著有師竹軒尺牘晚香詩  
鈔各若干卷

○馮登府字雲伯號柳東浙江嘉興人嘉慶庚辰進士入  
詞垣散館改教授秉鐸數年居母憂來崑館邑中李氏  
自少工詞章湛深經術宗漢學以毛詩多假借字三家  
詩多本字著三家詩異文疏證六卷補遺三卷喜填詞  
著有春陰閣倚聲二卷鐫版藏門人李德郊家又工篆  
隸精鐵筆先是館李氏有張昌衢字步康號堯民亦嘉  
興人畝內行績學能文其經術詩賦爲先後視學浙江  
擊節歎賞由優行貢成均膺嘉慶丙子鄉薦放榜甫市  
月齋志歿所著有禮記地理攷經義咫聞詩古文詞等  
若干卷

○李福號子僊吳縣人舉人自幼能文名噪士林工詞章  
尤精書法晉唐名碑臨摹靡不神肖愛崑城馬鞍山秀

僑寓山南拱玉樓求書箋幅積案如山時與邑中李光祿存厚王監簿學浩飲酒聯吟唱和酬贈之篇梭織詩筒幾無虛日

○李鈞載原名鈞奏字愔永號穆卿保泰子寶山縣增廣生嘉慶戊午領鄉薦少隨宦揚州天懷誠篤不慕榮利事親左右勿離濡染家學工古文詞保泰致仕寓崑山鈞載栽花種竹累石爲山以娛親精賞鑒碑版書畫真贋立辨晚年謁選得知縣以母老不忍遠遊改官教諭常熟訓士有法先行後文士入黌者不責厚贄蒞任明年卒於官年七十八著有贈雲軒詩文稿若干卷鈞載子榮紳同文榮紳外粵匪難別見忠節傳同文更名韜

字端仲補諸生敦內行與兄相勉以學撫孤姪教育如已子道光辛卯以優行貢成均甲午舉順天經魁三試禮部俱被放遂侘傺以卒年僅四十六士論惜之

○湯運泰字黼良號虞樽青浦人歲貢生道光初徙居崑西鄉張浦鎮博學能文游其門下者多知名士流覽經史覃精周易旁推交通證據史事細書成帙名曰易徵足補誠齋易傳所未及中年後又專事史部自史漢訖元明反覆交勘參以別史及百家紀載意有所得輒紀以詩用編年例纂成一編獨金源紀事詩倣楊鐵厓專以樂府紀事取材博持論嚴凡所採錄足資聞見詩格沈雄蒼古與尤侗相埒又倣裴氏注三國志例注陸游

南唐書補闕正訛晨昏檢閱自立課程蠅頭細書畫五千字夜二千字書成羣稱博雅有綠籤山房集

○龔自珍字璉人浙江仁和人世以科名顯父麗正由翰林出守徽州移安慶擢蘇松太兵備道所至有善政自珍幼稟異姿聰俊絕倫博通今古精六書音韻之學兼能譯佛老家言放誕自喜不拘繩墨科場例凡翰詹科道子弟得考官卷較民卷易入選自珍不屑藉門蔭以縣學生中式嘉慶戊寅本省經魁授內閣中書侍才傲物京師貴人多不悅屢詘於南宮素輕財任意揮霍既購洞庭別業又得崑山徐尚書園亭園築峻樓三層最上層藏漢趙飛燕玉印姚總憲元之顏其額曰寶燕閣

時奉老母來園息夏居數年歸藉丁內艱道光己丑成進士由中書擢禮部主事丁外艱掌教雲陽書院以暴病終著有古文詩詞集行世

○戴壽南字瑞符號萼峯汝槐孫書源子以長洲縣學生中式戊寅恩科舉人少好學工文章屢應禮部試不遇堂兄葆瑩以庶常散館宰河南夏邑聘往掌教魯山書院誨人有法當道爭延致師席以訓子弟論文悉本先正典型得其指授者皆取科第以去爲人忠厚甘澹泊不喜奔競兩世同年生官江左絕未嘗干謁晚年境益困人有勸其營求者答曰求之而得命也求之而不得不特不知命適以納侮而滋之恥也吾亦安分以俟

命而已生平詩文稿不自惜每爲門下主携去存者絕少咸豐三年卒年六十八

○張光熊號淡娛吳縣人餘姚知縣吉安長子爲崑山監簿王學浩女夫受業於學浩讀書馬鞍山南老屋數年性孝友如其父

○應嘉穎字稻孫號五峯太倉人先世由浙之武康僑居太倉父經營號鹿田州庠生學行俱優嘉穎性誠慤客授以館爲家道光丁酉舉鄉飲賓年八十餘晚歲卜宅於崑山城中一枝園基側偕其配周氏一月間先後卒子伸蒙字遠亭亦州庠生善考据訓詁之學爲人嚴毅事親以孝稱奉父母寓邑中卒年六十餘

○李可久字次玉號小香吳縣人庠生少孤儀徵阮相國元扶植之得成立工駢體文曾寓邑中張氏眠琴窩道光戊申自宣城回西渡高涇湖覆舟死無子有遺詩一卷

○陳渠號木癡元和人監生寓居邑之時家園側屢試南闈不遇著有鄉黨俟正攷後返郡卒於桃花塢僧舍未娶無嗣

○俞大樟字味庸嘉定人好施予家中落晚年授徒邑之東北鄉最久和氣盎然諳諳以孝弟力田爲勸年七十餘返嘉定值粵匪亂糾同志練鄉勇守西門城潰不知所終

○陸瑛字杏莊太倉人歲貢生館邑中王氏最久從游門下者至數十人課嚴化速人以制義重之瑛自若也酒後常自歎曰生平於歸有光文服膺最深夢寐中能背誦如流尤善散體文俱未傳世咸豐未卒

○宣鏞字杏坪嘉定諸生館崑邑張浦鎮許氏受業嘉定錢宮詹大昕爲六書蒼雅之學著說文標目一卷子陳奎字燦文道光甲午舉人亦精說文韻學僑寓張浦鎮最久著有正味齋駢體文十卷詩六卷

○金待鎔字練邨元和人拔貢生亦館張浦許氏工詞章有醕風書屋集若干卷其橐本存門人許鉉家

○王文林號杏園鎮洋人少孤居貧力學精制藝悉宗先正典型學使江右辛少司空從益案試得文林卷擊節歎賞目爲吳下通才迭拔首列得餼於庠晚年來崑館邑中李氏課嚴化速尤以先行後文爲訓後得心悸病卜居虞山卒年六十餘

○陳垚圭字一愚號揖虞青浦人道光初舉人天姿敏捷行文縱橫馳驟握筆成章道光丁酉春寓新邑西鄉古塘邨孫氏從游門下者衆垚圭父夔伯精岐黃術至是以所習家傳名聞遠近越六年返青浦咸豐元年卒

○富開益號香吏浙江海鹽人爲弟子員屢應鄉舉不得志避仇棄諸生迹江湖間天姿敏達六經諸史外天文地理星卜遁甲等書無不流覽尤精算學工青烏術

道光中至崑山城鄉無定居嘗獨處斗室插架書滿嗜  
漢人學與談論古今事答問如流常屈其坐人平日衣  
短褐入夏手揮羽扇恆赤腳人呼爲赤腳仙頗從之問  
字或延相地心所喜卽偕往不喜不至也巡撫徐有壬  
以算學與交有壬姪葬其親拏舟來崑啟請會開益喪  
孫疾作停橈一月候之竟不往其性乖僻傲晚一切類  
如此嘗謂風鑒當辨形勢情氣因縱言及詩曰衛風定  
之方中篇云升彼虛矣以望楚矣降觀于桑卜云其吉  
大雅公劉篇云陟則在巘復降在原相其陰陽觀其流  
泉此形家言之祖知六經無所不包今人但用子午盤  
以定向背形勢尙不能周知遑論情氣乎故吾之相地

必於上下四方求之此古法也咸豐末謁徐巡撫抵掌  
談禦寇事宜不用而去賊去後間至崑爲人相地同治  
十一年卒年七十餘

○龔鎮海字文灤號秋舫先世隸華亭縣籍父聖臣無子  
航海禱普陀山歸夢普陀僧而鎮海生幼姿英偉讀書  
不利補武庠生亦不舉去從戎守崑山葦葭汎遂遷居  
葦葭鎮之夜區一畝嘉慶初海逆蔡牽負固小羊山絕  
官軍糧道鎮海奉檄濟師以小艇載米泊爽缺口率舟  
出上游蔡逆移舟迎拒而下游小艇得經渡逆知失計  
遁去以功擢泰州守備河決荷花塘淮揚下河災倡率  
捐賑全活無算沿海捕魚小舟有竄入浙境爲盜者大

府概令禁燬鎮海廉得千三百舟怒然曰一二爲匪奈何使千百家失業力請弛禁旋調崇明水師守備歷奇營游擊吳淞參將會京口副將缺員制軍孫玉庭以鎮海本省人題補得允旨時稱異數晉定海總兵定海孤懸海外多奸民至則親履轄境禁外省漁船混雜商船遭風定救護賞格分兵內外洋嚴緝搶奪又僱商船伏精勇隨潮來往連獲巨盜洋面肅清蒙優旨嘉獎道光庚寅以足疾引歸喜善舉生平俸入加惠軍士倡修定海文廟置田裕賓興費捐貲助育嬰濬河道設義冢施棺捨藥歲以爲常士民泐石記之肖像建生祠年七十有五卒子廷煥府學附生廷煌增貢生援例得

知縣歷署山東新城商河漕城縣事授淄川令卓異擢知高唐州所至以文學飾吏治任商河時辦縣境自漢暨宋盡河流所經河形久廢惟土河南河沙河卽篤馬河者條分縷晰詳載商河縣志廷棟諸生先卒

○葉裕仁字復三號涵溪晚號歸菴鎮洋人自幼凝重慎默入塾讀書熟誦默識不待教督稍長肆力詩文弱冠補諸生研治經學約同學仿陸桴亭志學錄日記善過敬怠以自省察旣壯以鄒氏學爲學使祁文端公賞拔目爲江左宿學遂餼於庠客授崑城方氏年久因與潘道根訂交講求性理間商榷經義咸豐紀元薦舉孝廉方正旋貢成均就職直隸州州判生平手不釋卷尤邃

於儒先性理諸書朱陸薛王異同辨晰精細不肯妄詆陸王嘗謂門弟子曰宋儒語語足箴膏肓實做居敬窮理工夫自有進境爲古文尙氣格遠法史公近慕震川其駢體文詩追撫漢魏六朝下逮三唐制義法金陳歲科試屢列高等名噪遠近七應省試不遇遂絕意功名輯鄉先輩陸桴亭陳確菴詩文鈔積數十年始有定本集資付刊素不與戶外事遇地方利害上書當道如漕折價昂請隨時長落木棉荒歉請多與災分他若論開河積穀之弊悉從其議性尤孝事親先意承志得歡心父歿適應省試聞訃痛不欲生以未視含歛引恨終天垂老憶述猶流涕不已母歿年近六旬哀燬骨立櫻簪

疾數月訪家禮於寢室西構屋奉祖先栗主時祭必齋戒滌濯卒事無聲歎聲家雖貧親族無力喪葬婚嫁者時慨助之邑中立儒寡會創捐書院修金以成之主婁東安道兩書院講席訓生徒讀書散行交相資益同治甲子寇平今合肥李爵相撫江蘇延纂蘇省昭忠錄方伯應寶時開書局重刊典籍延司總校多所攷正光緒初修州志主纂輯盡心釐訂年七十一以積勞瘁疾卒著有詩集二卷文集三卷詩文字攷三卷三家詩攷箋釋三卷喪禮易從三卷勸葬集說三卷禮記集說糾舛讀管筍記各一卷



昆新兩縣續修合志卷三十四終

